

唐劉隨州詩集卷第一

隨州刺史劉長卿

逢雪宿芙蓉山主人

日暮蒼山遠天寒白屋貧柴門聞犬吠風雪夜歸人
送張起崔載華之閩中

朝無寒士達家在舊山貧相送天涯裏憐君更遠人
贈秦系徵君

群公誰讓位五柳獨知貧惆悵青山路煙霞老此人
秦系頃以家事獲謗因出舊山每荷觀察崔公
見知欲歸未遂感其流寓詩以贈之

初迷武陵路復出孟嘗門迴首江南岸青山與舊恩
夜中對雪贈秦系時秦初與謝氏離婚謝氏在
越

月明花滿地君自憶山陰誰遣因風起紛紛亂此心
湘妃

帝子不可見秋風來暮思嬋娟湘江月千載空蛾眉
斑竹

蒼梧千載後斑竹對湘沅欲識湘妃怨枝枝滿淚痕
春草宮懷古

君王不可見芳草舊宮春猶帶羅裙色青青向楚人

正朝覽鏡作

憔悴逢新歲茅扉見舊春朝來明鏡裏不忍白頭人

瓜洲道中送李端公南渡後歸揚州道中寄

片帆何處去匹馬獨歸遲惆悵江南北青山欲暮歸

送張十八歸桐廬

歸人乘野艇帶月過江村正落寒潮水相隨夜到門

過白鶴觀尋岑秀才不遇

不知方外客何事鎖空房應向桃源裏教他喚阮郎

聽彈琴

泠泠七絲上靜聽松風寒古調雖自愛今人多不彈

遊南國偶見在陰墻下葵因以成詠

此地常無日青青獨在陰太陽偏不及非是未傾心
入百丈澗見桃花晚開

百丈深澗裏過時花欲妍應緣地勢下遂使春風偏
送子婿崔貢甫李穆往揚州

渡口發梅花山中動泉脉蕪城春草生君作揚州客
其二

半邏鶯滿樹新年人獨還落花逐流水共到茱萸灣
其三

雁還空渚在人去落潮翻臨水獨揮手殘陽歸掩門

其四

狎鳥携稚子釣魚終老身殷勤囑歸客莫話桃源人
寄龍山道士許法稜

悠悠白雲裏獨住青山客林下晝焚香桂花同寂寂
送方外上人

孤雲將野鶴豈向人間住莫買沃州山時人已知處
送靈澈上人

蒼蒼竹林寺杳杳鍾聲晚荷笠帶夕陽青山獨歸遠
茱萸灣北答崔載華問

荒涼野店絕迢遞人煙遠蒼蒼古木中多是隋家苑

赴楚州次自田途中阻淺問張南史

楚城今近遠積霽寒塘暮水淺舟且遲淮潮至何處

江中對月

空洲夕煙斂望月秋江裏歷歷沙上人月中孤渡水
碧澗別墅喜皇甫侍御相訪

荒村帶返照落葉亂紛紛古路無行客寒山獨見君
野橋經雨斷澗水向田分不爲憐同病何人到白雲
初到碧澗招明契上人

漸老知身累初寒曝背眠白雲留永日黃葉減餘年
猿護窓前樹泉澆谷後田沃洲能共隱不用道林錢

送少微上人遊天台

石橋人不到獨往更迢迢乞食山家少尋鍾野路遙
松門風自掃瀑布雪難消秋夜聞清梵餘音逐海潮
却歸睦州至七里灘下作

南歸猶謫宦獨上子陵灘江樹臨洲晚沙禽對水寒
山開斜照在石淺亂流難惆悵梅花發年年此地看
對酒寄嚴維

陋巷喜陽和衰顏對酒歌懶從華髮亂閑任白雲多
郡簡容垂釣家貧學弄梭門前七里瀨早晚子陵過

新年作

鄉心新歲切天畔獨潛然老至居人下春歸在客先
嶺猿同旦暮江柳共風煙已似長沙傳從今又幾年
朱放自杭州與故里相使君立碑回因以奉簡

吏部楊侍郎製文

片石羊公後淒涼江水濱好辭千古事墮淚萬家人
鵬集占書久鸞回刺篆新不堪相顧恨文字日生塵

送宣尊師醮畢歸越

吹簫江上晚惆悵別茅君踏火能飛雪登刀入白雲
晨香長日在夜磬滿山聞揮手桐溪路無情水亦分
送裴使君赴荆南行軍司馬

盛府南門寄前程積水中月明臨夏口山晚望巴東
故節辭江郡寒笳發渚宮漢川風景好遙羨逐羊公

送裴郎中貶吉州

亂軍交白刃一騎出黃塵漢節同歸闕江帆共逐臣
猿愁岐路晚梅作異方春知己鄭侯在應憐脫粟人

酬皇甫侍御見寄時前相國姑臧公初臨郡

離別江南北汀洲葉再黃路遙雲共水砧迥月如霜
歲儉依仁政年衰憶故鄉佇看宣室召漢法倚張綱
月下呈章秀才

自古悲搖落誰人柰此何夜蛩偏傍枕寒鳥數移柯

向老三年謫當秋百感多家貧惟好月空媿子猷過

酬張夏

幾歲依窮海頽年惜故陰劍寒空有氣松老欲無心
翫雪勞相訪看山正獨吟孤舟且莫去前路水雲深

送李使君貶連州

獨過長沙去誰憑此路愁秋風散千騎寒雨泊孤舟
賈誼辭明主蕭何識故侯漢廷當自召湘水但空流

秋夜北山精舍觀體如師梵

焚香奏仙唄向夕遍空山清切兼秋遠威儀對月閑
靜分巖響答散逐海潮還幸得風吹去隨人到世間

酬張夏雪夜赴州訪別途中苦寒作

扁舟乘興客不憚苦寒行晚暮相依分江潮欲別情
水聲冰下咽砂路雪中平舊劔鋒鏖盡應憐贈脫輕

尋洪尊師不遇

古木無人地來尋羽客家道書堆玉按仙帔疊青霞
鶴老難知歲梅寒未作花山中不相見何處化丹砂

喜鮑禪師自龍山至

故居一作山何日下春草欲芊芊猶對山中月誰聽石
上泉猿聲知後夜花發見流年杖錫閑來往無心到

處禪

送方外上人之常州依蕭使君

宰臣思得度鷗鳥戀為群
遠客迴飛錫空山卧白雲
夕陽孤艇去秋水兩溪分
歸共臨川史同翻貝葉文
宿北山禪寺蘭若

上方鳴夕磬林下一僧還
密行傳人少禪心對虎閑
青松臨古路白日滿寒山
舊識窓前桂經霜更待一作
得攀

赴新安別梁侍郎

新安君莫問此路水雲深
江海無行跡孤舟何處尋
青山空向淚白月豈知心
縱有餘生在終傷老病侵

江州留別薛六柳八二員外

江海相逢少東南別處長
獨行風嫋嫋相去水茫茫
白首辭同舍青山背故鄉
離心與潮信每日到潯陽

和州留別穆郎中

播遷悲遠道搖落感衰容
今日猶多難何年更此逢
世交黃葉散鄉路白雲重
明發看煙樹唯聞江北鐘
和州送人歸復郢

因家漢水曲相送掩柴扉
故郢生秋草寒江淡落暉
綠林行客少赤壁住人稀
獨過潯陽去潮歸人不歸

送金昌宗歸錢塘

新家浙江上獨泛落潮歸秋水照華髮涼風生褐衣
柴門嘶馬少藜杖拜人稀惟有陶潛柳蕭條對掩扉

酬張夏別後道中見寄

離群方歲晏謫宦在天涯暮雪同行少寒潮欲上遲
海鷗知吏傲砂鶴見人衰只畏生秋草西歸亦未期

新安奉送穆諭德歸朝賦得行字

九重宣室召萬里建溪行事直皇天在歸遲白髮生
用材身復起覩聖眼猶明離別寒江上潺湲若有情

偶然作

野寺長依止田家或往還老農開古地夕鳥入寒山

書劍身同廢煙霞吏共閑豈能將白髮扶杖出人間

送州人孫沅自本州却歸句章新營所居

故里歸成客新家去未安詩書滿蝸舍征税及漁竿

火種山田薄星居海島一作鳥寒憐君不得已步步別

離難

送李員外使還蘇州燕呈前袁州李使君賦得

長字袁州即員外之從兄

別離共成怨一作誠衰老更難忘夜月留同舍秋風

在遠鄉朱絃徐向燭白髮強臨觴歸獻西陵作誰知

此路長

酬李員外從崔錄事

寒江鳴石瀨歸客夜初分人語空山答猿聲獨戾聞
遲來朝及暮愁去水連雲歲晚心誰在青山見此君
見秦系離婚後出山居作

豈知偕老重垂老絕良姻郝氏誠難負朱家自愧貧
綻衣留欲故織錦罷經春何況薜蘿綠一作空山不
見人

酬秦系

鶴書猶未至那出白雲來舊路經年別寒潮每日迴
家空歸海燕人老發江梅最憶門前柳閑居手自栽

歲日作

建寅迴北斗看曆占春風律變滄江外年加白髮中
春衣試稚子壽酒勸衰翁今日陽和發榮枯豈不同
題元錄事開元所居

幽居蘿薜情高卧紀綱行鳥散秋鷹下人閑春草生
冒嵐歸野寺收印出山城今日新安郡因君水更清
送崔載華張起之閩中

不識閩中路遙知別後心猿聲入嶺切鳥道問人深
旅食過夷落方言會越音西征開幕府早晚用陳琳
送張司直越嶺南謁張尚書

番禺萬里路遠客片帆過盛府依橫海荒祠拜伏波
人經秋瘴變鳥墜火雲多誠憚炎洲裏無如一顧何

寄會稽公徐侍郎

公時在王傳

搖落淮南葉秋風想越吟鄒枚入梁苑逸少在山陰
老鶴無衰貌寒松有本心聖朝難稅駕惆悵白雲深

送朱山人越州賊退後歸山陰別業

越州初罷戰江上送歸橈南渡無來客西陵自落潮
空城垂故柳舊業廢春苗閭里相逢少鶯花共寂寥
秋夜肅公房喜普門上人自陽羨山至

山樓久不見林下偶同遊早晚來香積何人住沃洲

寒禽驚後夜

一作獨夜一作後晚

古木帶高秋却入千峰去孤

雲不可留

送李秘書却赴南中

此公舉家先流嶺外兄弟數人俱沒南中

却到番禺日應傷昔所依炎洲百口住故國幾人歸
路識梅花在家存棣萼稀獨逢迴鴈去猶作舊行飛
過前安宜張明府郊居

寂寥東郭外白首一先生解印孤琴在移家五柳成
夕陽臨水釣春雨向田耕終日空林下何人識此情
使迴次柳楊過元八所居

君家楊柳渡來往落帆過綠竹經寒在青山欲暮多

薜蘿誠可戀婚嫁復如何無柰閉門外漁翁夜夜歌

送李侍御貶郴州

洞庭波渺渺君去吊靈均幾路三湘水全家萬里人
聽猿明月夜看柳故年春憶想汀洲畔傷心向白蘋

寄普門上人

白雲幽卧處不向世人傳聞在千峰裏心知獨夜禪
辛勤羞薄祿依止愛閑田惆悵王孫草青青又一年

逢郴州使因寄鄭協律

相思楚天外夢寐楚猿吟更落淮南葉難為江上心
衡陽問人遠湘水向君深欲逐孤帆去茫茫何處尋

岳陽館中望洞庭湖

萬古巴丘戍平湖此望長問人何淼淼愁暮更蒼蒼
疊浪浮元氣中流沒太陽孤舟有歸客早晚遶瀟湘

巡去岳陽却歸鄂州使院留別鄭洵侍御侍御

先曾謫居此州

何事長沙謫相一作長逢楚水秋暮帆歸夏口寒雨對
巴丘帝子椒漿奠騷人木葉愁誰憐萬里外離別洞

庭頭

夏口送屈突司直使湖南

共悲來夏口何事更南征霧露行人少瀟湘春草生

鷓鴣啼何處夢猿嘯若爲聲風月新年好悠悠遠客情

唐劉隨州詩集卷第一



唐劉隨州詩集卷第二

隨州刺史劉長卿

雨中過員稷巴陵山居贈別

憐君洞庭上白髮向人垂積雨悲幽獨長江對別離
牛羊歸故道猿鳥聚寒枝明發遙相望雲山不可知

送李中丞之襄州

李一作季一無
之襄州三字者

流落征南將曾驅十萬師罷歸無舊業老去戀明時
獨立三朝識輕生一劍知茫茫漢江上日暮復何之

奉使至申州傷經陷沒

舉目傷蕪沒何年此戰爭歸人失舊里老將守孤城

廢戍山煙出荒田野火行獨憐澗水上時亂亦能清
穆陵關北逢人歸漁陽

逢君穆陵路匹馬向秦乾
楚國蒼山古幽州白日寒
城池百戰後耆舊幾家殘
處處蓬蒿遍歸人掩淚看

安州道中經澹水有懷

征途逢澹水忽似到秦川
借問朝天處猶看落日邊
映沙晴漾漾出澗夜濺濺
欲寄西歸恨微波不可傳

步登夏口古城作

平蕪連古堞遠客此沾衣
高樹朝一作朝光上空城秋
氣歸微明漢水極搖落
楚人稀但見荒郊外寒鷓暮

暮飛

贈別盧司直之閩中

爾來多不見此去又何之
華髮同今日流芳似舊時
洲長春色遍漢廣夕陽遲
歲歲王孫草空憐無處期

酬郭夏人日長沙感懷見贈

此公此經流寓現在上都

舊俗歡猶在憐君恨獨深
新年向國淚今日倚門心
歲去隨湘水春生近桂林
流鶯且莫弄江畔正行吟

赴巴南書情寄故人

南過三湘去巴人此路偏
謫居秋瘴裏歸處夕陽邊
直道天何在愁容鏡亦憐
教書欲誰訴無淚可潸然

餘干旅舍

搖落暮天迥青楓霜葉稀孤城向水閉獨鳥背人飛
渡口月初上隣家漁未歸鄉心正欲絕何處搗寒衣
登思禪寺題脩竹茂松

上方幽且暮臺殿隱蒙籠遠磬秋山裏清猿古木中
衆溪連竹路諸嶺共松風儻許棲林下甘成白首翁
恩勅重推使牒追赴蘇州次前溪館作

漸入雲峰裏愁看驛路開亂鷗投落日疲馬向空山
且喜憐非罪何心戀末班天南一萬里誰料得生還
北歸次秋浦界清谿館

萬里猿啼斷孤村客暫依鴈過彭蠡暮人向宛陵稀
舊路青山在餘生白首歸漸知行近北不見鷓鴣飛
謫官後却歸故林將過虎丘悵然有作

萬事依然在無如歲月何邑人憐白髮庭樹長新柯
故老相逢少同官不見多唯餘舊山路惆悵枉帆過
重推後却赴嶺外待進止寄元侍郎

却訪巴人路難期國士恩白雲從出岫黃葉已辭根
大造功何薄長年氣尚寬空令數行淚來往落湘沅
秋杪江亭有作一作秋杪于越亭

寂寞江亭下江楓秋氣斑一作日暮更愁遠天涯殊未還世情何處

澹一作湘水向人雨寒渚一孤鴈夕陽一作千萬山
扁舟如一作落葉此去未知還一作洞庭間

送鄭司直歸上都

歲歲逢離別蹉跎江海濱宦遊成楚老鄉思逐秦人
馬首歸何日鶯啼又一春因君報情舊閑慢欲垂綸

送靈澈上人歸嵩陽蘭若

南地隨緣久東林幾歲空暮山門獨掩春草路難通
作梵連松韻焚香入桂叢唯將舊瓶鉢却寄白雲中
却赴南邑留別蘇臺知己

又過梅嶺上歲歲此枝寒落日孤舟去青山萬里看

猿聲湘水靜草色洞庭寬已料生涯事唯應把釣竿

和靈一上人新泉

東林一泉出復與遠公期石淺寒一作流處山空

夜一作落時一作處一作空山夜月時夢閑聞一作細響慮澹

對向一作清漪動靜皆無意一作唯應達一作者知

將赴江南湖上別皇甫曾

此去君何恨南行我更遙東西湖渺渺離別雨蕭蕭
綠水通春谷青山過板橋潯陽如枉棹千里有歸潮

一作梳

送李攀赴延陵令

清風季子邑想見下車時向水彈琴靜看山採菊遲
明君加印綬庶使託惇婆旦暮華陽洞雲峰若有期

奉送裴員外赴上都

彤檐江上遠萬里詔書催獨過潯陽去空憐潮信迴
離心秋草綠揮手暮帆開想見秦城路人看五馬來

長沙桓王墓下別李紆張南史

長沙千載後春草獨萋萋流水朝將暮行人東復西
碑苔幾字滅山木萬株齊佇立傷今古相看惜解携

送侯御赴黔中充判官

不識黔中路今看遣使臣猿啼萬里客鳥似五湖人

地遠官無法山深俗豈淳須令荒徼外亦解懼理輪

秋日登吳公臺上寺遠眺寺即陳將吳明徹戰

場

古臺搖落後秋日望鄉心野寺來人一作少雲峰隔

水一作隔深又陽依舊壘寒磬滿空林惆悵南朝事長

江獨至今

淮上送梁二恩命追赴上都

賈生年最少儒行漢庭聞拜手卷黃紙迴身謝白雲
故關無去客春草獨隨君森森長淮水東西自此分

送崔昇歸上都

舊寺尋遺緒歸心逐去塵
早鶯何處客古木幾家人
白髮經多難滄洲欲暮春
臨期數行淚為爾一沾巾

過李將軍南鄭林園觀妓

郊原風日好百舌弄何頻
小婦秦家女將軍天上人
鴉歸長郭暮草映大堤春
客散垂楊下通橋車馬塵

送嚴侍御充東畿觀察判官

洛陽征戰後君去開凋殘
雲月臨南至霜風向北寒
故園經亂久古木隔鄰看
誰訪江城客年年守一官

送王端公入奏赴上都

舊國無家訪臨岐亦羨歸
途經百戰後客過二陵稀

秋草通征騎寒城背落暉
行當蒙顧問吳楚歲頻饑

送管田判官鄭侍御起上都

上國三千里西還及歲芳
故山經亂在春日送歸長
曉奏趨雙闕秋成報萬箱
幸論開濟力已實海陵倉

送李校書赴東浙幕府

方從大夫後南去會稽行
森森滄江外青青春草生
芸香辭亂事梅吹聽軍聲
應訪王家宅空憐江水平

清明後登城眺望

風景清明後雲山睥睨前
百花如舊日萬井出新烟
草色無空地江流合遠天
長安在何處遙指夕陽邊

陪王明府泛舟

花縣彈琴暇，樵風載酒時。山含秋色近，鳥度夕陽遲。
出沒鳧成浪，蒙籠竹亞枝。雲峰逐人意，來去解相隨。
送度支留後若侍御之歙州便赴信州省覲

國用憂錢穀，朝推此任難。即山榆莢變，降雨稻花殘。
林響朝登嶺，江喧夜過灘。遙知驄馬色，應侍倚門看。

餘干夜宴奉餞前蘇州常使君

復拜東陽郡，遙馳北闕心。行春五馬急，向夜一猿深。
山過康郎近，星看婺女臨。幸容棣詔分，猶戀舊棠陰。
晚次苦竹館，卻憶于越舊游。

匹馬風塵色，千峰旦暮時。遙看落日盡，獨向遠山遲。
故驛花臨道，荒村竹映籬。誰憐却迴首，步步戀南枝。
送李二十四移家之江州

煙塵猶一作遙，滿目岐路易一作亦，沾衣逋一作遷，客多南

渡征一作春，鴻自北飛，九江春草綠一作東林，千里暮

潮歸，別後難一作誰，相訪全家隱，釣磯一作美爾全家，隱爐峰對掩扉。

送盧判官南湖

漾舟仍載酒，愧爾意相寬。草色南湖綠，松聲小署寒。
水禽前後起一作出，花嶼往來看。已作滄洲調，無心戀

一官

送張栩扶侍之睦州

此公舊任建德令

遙憶新安舊扁舟復却還淺深看水石來往逐雲山
入縣餘花在過門故柳閑東征隨子去皆隱薜蘿間

集梁耿開元寺所居院

到君幽卧處爲我掃莓苔花雨晴天落松風終日來
路經深竹過門向遠山開豈得長高枕中朝正用才

贈西鄰盧少府

籬落能相近漁樵偶復同苔封三徑絕溪向數家通
犬吠寒煙裏鷓鳴夕照中時因杖藜次

一作尙因相
藍舉出

訪竹林東

遊休禪師雙峰寺

雙扉碧峰際遙向夕陽開飛錫方獨往孤雲何事來
寒潭映白月秋雨上青苔相送東郊外羞看驄馬回

解中見桃花南枝已開北枝未發因寄杜副端

何意同根本開花每後時應緣去日遠獨自發春遲
結實恩

一作應

難忘

一作望

無言恨豈知年光不可待空

羨向南枝

奉送盧員外之饒州

天書萬里至旌旆上江飛日向鄱陽近應看吳岫微
暮帆何處落潮水背人歸風土無勞問南枝黃葉稀

送處士歸州因寄林山人

陵陽不可見，獨往復如何。
舊邑雲山裏，扁舟來去過。
鳥聲春谷靜，草色太湖多。
儻宿荆溪夜，相思漁者歌。

移使鄂州次峴陽館懷惟舊居

多慙恩未報，敢問路何長。
萬里通秋鴈，千峰共夕陽。
舊遊成遠道，此去更遙鄉。
草路深山裏，朝朝落客裳。

送齊郎中赴海州

華省占星動，孤城望日遙。
直廬收舊草，行縣及新苗。
滄海天連水，青山暮與朝。
閭閻幾家散，應待下車招。
重陽日鄂城樓送屈突司直

登高復送遠，惆悵洞庭秋。
風景一作水

一作同前古雲山滿

上游蒼蒼來，暮雨淼淼逐寒流。
今日關中事，蕭何共爾憂。

更被奏留淮南送從弟罷使江東

又作淮南客，還悲木葉聲。
寒潮落瓜步，秋色上蕪城。
王事何時盡，滄洲羨爾行。
青山將綠水，惆悵不勝情。

經漂母墓

昔賢懷一飯，茲事已千秋。
古墓樵人識，前朝楚水流。
渚蘋行客薦，山木杜鵑愁。
春草茫茫綠，王孫舊此遊。

送李端公赴東都

軒轅征戰後江海別離長遠客歸何處平蕪蒲故鄉
夕陽帆杳杳舊里樹蒼蒼惆悵蓬山下瓊枝不可忘

送王員外歸朝

往來無盡目離別要逢春海內雖多事天涯見近臣
芳時萬里客鄉路獨歸人魏闕心常在隨君亦向秦

送蔣侍御入秦

朝見及芳菲恩榮出紫微晚光臨仗奏春色共西歸
楚客移家老秦人訪舊稀因君鄉里去爲掃故園扉

洞庭驛逢郴州使還寄李湯司馬

洞庭秋水濶南望過衡峰遠客瀟湘裏歸人何處逢

孤雲飛不定落葉去無蹤莫使滄浪叟長歌笑爾容

送舍弟之鄱陽居

鄱陽寄家處自別掩柴扉故里何人在滄波孤客稀
湖山春草遍雲木夕陽微南去逢迴鴈應憐相背飛

送裴二十端公使嶺南

蒼梧萬里路空見白雲來遠國知何在憐君去未迴
桂林無葉落梅嶺白花開陸賈千年後誰看朝漢臺

過桃花夫人廟

寂寞應千歲桃花想一枝路人看古木江月向空祠
雲雨飛何處山川是舊時獨憐春草色猶似憶佳期

鄂渚送池州程使君

蕭蕭五馬動欲別謝臨川落日蕪湖色空山梅冶作
煙江潮通廨舍楚老拜戈船風化東南滿行舟來
去傳

送友人西上

羈心不自解有別會泣之春草連天積平陵遠客歸
十年經轉戰幾處便芳草想見函關路行人去亦稀

送梁州中書

遙想虛樓別還我
看竹經霜少
霜後帶月多
行愁微拜日無柰借留何

過湖南羊處士別業

一作來處
士別業

杜門成白首湖上寄生涯秋草蕪一作三徑寒塘獨

一家鳥歸村落盡水向縣城斜自有東籬菊年年解

作花

一作愛汝醒還
醉東籬菊正花

送河南元判官赴河南

御當苗稅九百官俸錢

春草長河曲離心共渺然方收漢家俸獨向汶陽田

鳥雀空城在榛蕪舊路還山東征戰苦幾處有人煙

夏中崔中丞宅見海紅搖落一花獨開

何事一花殘開庭百草闌綠滋經雨發紅艷隔林看
竟日餘香在過時獨秀難共憐芳意晚秋露未湏團

使還至菱陂驛渡瀨水作

清川已再涉疲馬共西還何事行人倦終年流水閑
孤煙飛廣澤一鳥向空山愁入雲峰裏蒼蒼閉古關
送齊郎中典括州

星象移何處旌麾獨向東勸耕滄海畔聽訟白雲中
樹色雙溪合猿聲萬嶺同石門康樂住幾里枉帆通
過隱空和尚故居

自從飛錫去人到沃州稀林下期何在山中春獨歸
踏花尋舊徑映竹掩空扉寮落東峰上猶堪靜者依
過蕭尚書故居見李花感而成詠


手植已芳菲心傷故徑微往年啼鳥至今日主人非
滿地誰當掃隨風豈復歸空憐萑隰陰在門客共沾衣
送袁處士

開田北川下靜者去躬耕萬里空江菼孤舟過郢城
種荷依野水移柳待山鶯出處安能問浮雲豈有情
酬李侍御登岳陽見寄

想見孤舟去無由此路尋暮帆遙在眼春色獨何心
綠水瀟湘闊青山鄂杜深誰當北風至爲爾一開襟

唐劉隨州詩集卷第二

唐劉隨州詩集卷第二



國家圖書館, NATIONAL CENTRAL LIBRARY, TAIWAN, R.O.C.

唐劉隨州詩集卷第三

隨州刺史劉長卿

夏口送徐郎中歸朝

星象南宮遠風流上客稀
九重思曉奏萬里見春歸
棹發空江響城孤落日暉
離心與楊柳臨水更依依
鄂渚聽杜陵駕彈胡琴

文姬留此曲千載一知音
不辭胡人語空留一作楚
容心聲隨邊草動意入隴雲深
何事長江上蕭蕭出塞吟

過鸚鵡洲王處士別業

白首此爲漁青山對結廬問人尋野筭留客饋家蔬
古柳依沙發一作岸春苗帶雨鋤共憐芳杜色終日伴
閑居

寄萬州崔使君令欽

時艱方用武儒者任浮沉搖落秋江暮憐君巴峽深
立門多白首蜀郡滿青襟自解書生詠愁猿莫夜吟
送馬秀才移家京洛便赴舉

自從爲楚客不復掃荆扉劍共丹誠在書隨白髮歸
舊遊經亂靜後進識君稀空把相如賦何人薦禮闈
送南特進赴歸行營

聞道軍書至揚鞭不問家虜雲連白草漢月到黃沙
汗馬河源飲燒羗隴坻遮翩翩新結束去逐李輕車
送道標上人歸南岳

悠然倚孤棹却憶卧中林江草將歸遠湘山獨往深
白雲留不住涿水去無心衡岳千峰亂禪房何處尋
送梁侍御巡永州

蕭蕭江雨暮客散野亭空憂國天涯去思鄉歲暮同
到時猿未斷迴處水應窮莫望零陵路千峰萬木中
歲夜喜魏萬成郭夏雪中相尋

新年欲變柳舊客共霑衣歲夜猶難盡鄉春又獨歸

寒燈映虛牖暮雪掩閑扉且莫乘船去平生相訪稀
送蔡侍御赴上都

遲遲立駟馬久客戀瀟湘明日誰同路新年獨到鄉
孤煙向驛遠積雪去關長秦地看春色南枝不可忘

煙一作燈

晦日陪辛大夫宴南亭

月晦逢休澣年光逐宴移早鶯留客醉春日爲人遲
莫草全無葉梅花遍墜枝政閑風景好莫比峴山時

送獨孤判官赴嶺

伏波初樹羽待爾靜川鱗嶺海看飛鳥天涯問遠人

蒼梧雲裏夕青草嶂中春遙想文身國迎舟拜使臣

長沙館中與郭夏對雨

長沙積雨晦深蒼絕人幽潤上春衣冷聲連暮角愁
雲橫全楚地樹暗古湘洲杳藹江天外空堂生百憂

陪辛大夫西亭宴觀妓

歌舞憐遲日旄麾映早春鶯窺隴西將花對洛陽人
醉罷知何事恩深忘此身任他行雨去歸路裏香塵

題萬成江亭

蕭條方歲晏牢落對空洲才出時人右家貧湘水頭
蒼山隱暮雪白鳥沒寒流不是蓮花府冥冥不可求

春過裴虬郊園

時裴不在因以寄之

郊原春欲暮桃杏落紛紛何處隨芳草留家寄白雲
聽鶯情念友看竹恨無君長嘯高臺上南風冀爾聞

送韋贇善使嶺南

欲逐

一作報

樓船將方安卉服夷炎洲經瘴遠春水上

瀧遲歲貢隨重譯年芳徧四時番禺靜無事空詠飲
泉詩

送喬判官赴福州

揚帆向何處插羽逐征東夷落人煙迥王程鳥路通
江流回澗底山色聚閩中君去凋殘後應憐百越空

送李補闕之上都

獨歸西掖去難接後塵遊向日三千里朝天十二樓
路看新柳夕家對舊山秋惆悵離心遠滄江空自流

送袁明府之任

既有親人術還逢試吏年蓬蒿千里閉村樹幾家全
雪覆淮南道春生潁谷煙何時當位政相府待聞天

海鹽官舍早春

小邑滄洲吏新年白首翁一官如遠客萬事極飄蓬
柳色孤城裏鶯聲細雨中羈心早已亂何事更春風

南湖送徐二十七西上

家在橫塘曲那能萬里遠門臨秋水捨帆帶夕陽飛
傲俗宜紗帽干時倚布衣獨將湖上月相逐去還歸

曲阿對月別岑况徐說

金陵已蕪沒函谷復煙塵猶見南朝月還隨上國人
白雲心自遠滄海意相親何事湏成列汀洲欲暮春

送李侍御貶鄱陽

此近由
此州使迴

迴車仍昨日謫去已秋風干越知何處雲山只向東
暮天江色裏田鶴稻花中却見鄱陽市猶應舊馬驄

送路少府使東京便應制舉

時梁宋
初失守

故人西奉使胡騎正紛紛舊國無來信春江獨送君

五言凌白雪六翮向青雲誰念滄洲吏一作忘機鷗
鳥群

松江獨宿

洞庭初下葉孤客不勝愁明月天涯夜青山江上秋
一官成白首萬里寄滄洲久被浮名繫能無愧海鷗

尋白石山真禪師舊草堂

惆悵雲山暮閉門獨不開何時飛杖錫終日閉蒼苔
隔嶺春猶在無人燕亦來誰堪暝投處空復一猿哀
送行軍張司馬罷使回

時危身赴敵事往任浮沉末路三江去當時百戰心

春風吳苑綠古木剡山深千里滄波上孤舟不可尋
喜李翰自越至

南浮滄海上萬里到吳臺久別長相憶孤舟何處來
春風催客醉江月向人開羨爾無羈束沙鷗猶不猜
罪所留繫寄張十四

不見君來久寃深意未傳冶長空得罪夷甫豈言錢
直道天何在愁容鏡亦憐因書欲自訴無淚可潸然
送勤照和尚往睢陽赴太守請

燃燈傳七祖杖錫爲諸侯來去雲無意東西水自流
青山春滿目白日夜隨舟知到梁園下蒼生賴此

長門怨

何事長門閉珠簾只自垂月移深殿早春向後宮遲
蕙草生閑地梨花發舊枝芳菲自思幸首著被風吹
過橫顧山人草堂

只見山相拚誰言路尚通人來千嶂外犬吠百花中
細草香飄雨垂楊閉卧風却尋樵徑去惆悵綠溪東
送李校書適越謁杜中丞

江風處處盡日暮水空波搖落行人去雲山向越多
陳蕃懸榻待謝客枉帆過相見耶溪路透迤入薜蘿
秋夜雨中諸公過靈光寺所居

晤語青蓮舍重門閉夕陰向人寒燭靜帶雨夜鍾沉
一作深流水從他事孤雲任此心不能捐斗粟終日愧
瑤琴

西亭夜燕喜評事兄拜會

猶是南州吏江城又一春隔簾湖上月對酒眼中人
棘寺初銜命梅仙已誤身無心羨榮祿唯待却垂綸
尋南溪常山道人隱居

一路經行處

一作蒼

苔見履痕白雲依靜者春草閉

開門過雨看松色隨山到水源溪花與禪意相對亦
忘言

揚州雨中張十宅觀奴

夜色帶

一作身

春煙燈花拂更燃殘粧添黛豔舞落

金鈿掩笑頻歌扇迎歌乍動絃不知巫峽雨何事海
西邊

赴宣州使院夜宴寂上人留辭前蘇烟常使君
白雲垂始願滄海有微波戀舊爭趨府臨危欲負戈
春歸花殿暗秋傍竹房多耐可機心息其如羽檄何
送薛承矩秩滿北遊

匹馬向何處北遊殊未還寒雲帶飛雪日暮鴈門關
一路傍汾水數州看晉山知君喜初服祇愛此身閑

錢別王十一南遊

望君煙水闊揮手淚沾巾飛鳥沒何處青山空向人
長江一帆遠落日五湖春誰見汀洲上相思愁白蘋

送嚴維尉諸暨

嚴即越州人

愛爾文章遠還家印綬榮退公無色羨簪下帶鄉情
喬木映官舍春山宜縣城應憐釣臺石閑却爲浮名
送李七之祚水謁張相公

惆悵青春晚慙慙濁酒壚後時長劍澁斜日片帆孤
東閣才子南昌老腐儒梁園舊相識誰憶卧江湖
送崔虞士先適越

山陰好雲物此去又春風越鳥聞花裏曹娥想鏡中
小江湖易滿萬井水皆通徒羨扁舟客微官事不同
奉陪使君西庭送淮西魏判官

得山字

羽檄催歸恨春風醉別顏能邀五馬送自逐一星還
破竹從軍樂看花聽訟閑遙知用兵處多在八公山
獄中見壁畫佛

不謂衙寬處而能窺大悲獨棲叢棘下還見雨花時
地狹青蓮小城高白日遲幸親方便力猶畏毒龍欺
送許拾遺還京

萬里辭三殿金陵到舊居文星出西掖卿月在南徐

故里驚朝服高堂捧詔書暫容乘駟馬誰許戀鱸魚

送張七判官還京觀省 大夫之子時初

春蘭方可採此去葉初齊函谷鶯聲裏秦山馬首西
庭闈新栢署門館舊桃蹊春色長安道相隨入禁闈
送孫瑩京監擢第歸蜀觀省

適賀一枝新旋驚萬里分禮闈稱獨步太學許能文
征馬望春草行人看暮雲遙知倚門處江樹正氛氲

送史九赴任寧陵兼呈單父史八時監察五兄

初入臺

趨府弟聯兄看君此去榮春隨千里道河帶萬家城

繡服棠花映青袍草色迎梁園脩竹在持贈結交情

卧病喜田九見寄

卧來能幾日春事已依然不解謝公意翻令靜者便
庭陰殘舊雪柳色帶新年寂寞深村裏唯君相訪偏
重過宣峯寺山房寄靈一上人

西陵潮信滿島嶼入中流越客依風水相思南渡頭
寒光生極浦暮雪映滄洲何事揚帆去空驚海上鷗
雲門寺訪靈一上人

所思勞日夕惆悵去西東禪客知何在春山到處同
獨行殘雪裏相見白雲中請近東林寺窮年事遠公

送陸羽之茅山寄李延陵

延陵衰草遍有路問茅山雞犬驅將去煙霞擬不還
新家彭澤縣舊國穆陵關處處逃名姓無名亦是閑
送靈一上人初還雲門

寒霜白雲裏法侶自相携竹逕通城下松風隔水西
方同沃洲去不作武陵迷髣髴知心處高峰是會稽
寄靈一上人

高僧本姓竺門士舊名林一去春山裏千峰不可尋
新年芳草遍終日白雲深欲徇微官去懸知訝此心
送韓司直

遊吳還入越來往任風波復送王孫去其如春草何
岸明殘雪在潮滿夕陽多季子留遺廟停舟試一過
酬李郎中夜登蘇州城樓見寄

辛勤萬里道蕭索九秋殘日照閩中夜天凝海上寒
客程無地遠主意在人安遙寄登樓作空知行路難
送人遊越

未習風波事初爲吳越遊露沾湖色曉月照海門秋
梅市門何在蘭亭水尚流西陵待潮處落日滿航舟
贈普門上人

支公身欲老長在沃洲多惠力堪傳教禪心久伏魔

山雲隨坐夏江草伴頭陀借問迴心後賢愚去幾何

送康判官往新安

不向新安去那知江路長猿聲近廬霍水色勝瀟湘
驛路收殘雨漁家帶夕陽何須愁旅泊使者在輝光

送顧長

由來山水客復道向新安半是乘潮便全非行路難
林月在野飯浦沙寒嚴子千年後何人釣舊灘

九日登李明府北樓

九日登高望蒼蒼遠樹低人煙湖草裏山翠縣樓西
霜降鴻聲切秋深客思迷無勞白衣酒陶令自相携

同諸公登樓

秋草行將暮登樓客思驚千家同霽色一鴈報寒聲
北望無鄉信東遊滯客行今君佩銅墨還有越鄉情

送友人南遊

不愁尋遠水目愛逐連山雖在春風裏猶從芳草間
去程何用計勝事且相關旅逸同群鳥悠悠往復還

送裴二十一

多病長無事開筵暫送君正愁帆帶雨莫望水連雲
客思閑偏極川程遠更分不須論早晚惆悵又離群

送張判官罷使東歸

白首辭知已滄洲憶舊居
落潮迴野艇積雪卧官廬
范叔寒猶在周王歲欲除
春山數畝地歸去帶經鉤

早春

微雨夜來歇江南春色迴
本驚時不住還恐老相催
人好千場醉花無百日開
豈堪滄海畔為客十年來

送青苗鄭判官歸江西

三苗餘古地五稼滿秋田
來問周公稅歸輸漢俸錢
江城寒背日溢水暮連天
南楚凋殘後疲民賴爾憐

唐劉隨州詩集卷第三

唐劉隨州詩集卷第四

過包尊師山院

隨州刺史劉長卿

賣藥曾相識吹簫此復聞
杏花誰是主桂樹獨留君
漱玉臨丹井圍碁訪白雲
道經今爲寫不慮惜鵝群
故女道士婉儀太原郭氏挽歌詞

作範宮闈睦歸真道藝超馭風仙路遠背日帝宮遙
鸞殿空留處霓裳已罷朝
淮王哀不盡松柏但蕭蕭
其二

官禁恩長隔神仙道已分
人間驚早露天失朝雲

逝水年無恨佳城日易曛
簫聲將薤曲哀斷不堪聞

少年行

射飛誇侍獵行樂愛聯鑣
薦枕青蛾豔鳴鞭白馬驕
曲房珠翠合深巷管絃調
日晚春風裏衣香滿路飄

歸弋陽山居留別盧邵二侍御

渺渺歸何處沿流附客船
久依鄱水住頻悅越人田
偶俗機偏少安閑性所便
祇應君少慣又欲寄林泉

赴江西湖上贈皇甫曾之宣州

莫恨扁舟去川途我更遙
東西湖渺渺離別雨蕭蕭
流水通春谷青山過板橋
天涯有來客進爾訪漁樵

湘中紀行十首

湘妃廟

荒祠古木暗寂寂此江濱
未作湘南雨知爲何處雲
苔痕斷珠履草色帶羅裙
莫唱迎仙曲空山不可聞

斑竹巖

蒼梧在何處斑竹自成林
點點留殘淚枝枝寄此心
寒山響易滿秋水影偏深
欲覓樵人路家籠不可尋

洞山陽

舊日仙成處荒林客到稀
白雲將犬去芳草任人歸
空谷無行徑深山少落暉
桃園幾家住誰爲掃荆扉

雲母溪

雲母溪水溪流如幾春深藏武陵客時過洞庭人
白髮新成鏡清光媚澗淪冢冢古松下歲晚掛頭巾
赤沙湖

茫茫雲母外一望一露永秋水連天闊洛陽何處歸
日對寒暄楚客來相問孤舟泊釣磯

山色無邊空如煙復如空孤峰夕陽後翠嶺秋天外
雲起遙驚江迥相向若不知今遠近到處猶相對
步空齋

江楓日搖落轉愛寒潭靜水色淡如空山光復相映
人閑流更慢魚戲波難定楚客往來多偏知白鷗性

石圍峰

前山帶秋色獨往秋江晚疊嶂入雲多孤峰去人遠
冥緣不可到蒼翠空在眼渡口問漁家桃源路深淺

浮石瀨

秋月照瀟湘月明聞盪槳石橫晚瀨急水落寒沙廣
衆嶺猿嘯重空江人語響清暉朝復暮如待扁舟賞
橫龍渡

空傳古岸下曾見蛟龍去秋水晚沈沈獨疑在何處

亂聲沙上石倒影雲中樹獨見一扁舟樵人往來渡
雜詠八首 上禮部李侍郎

幽琴

月色滿軒白琴聲宜夜闌颺颺青絲上靜聽松風寒
古調雖自愛今人多不彈向君投此曲所貴知音難

晚桃

四月深澗底桃花方欲然寧知地勢下遂使春風偏
此意頗堪惜無言誰爲傳過時君未賞空媚幽林前
疲馬

玄黃一疲馬筋力盡胡塵驤首北風夕徘徊鳴向人

誰憐棄置久却與鷓鴣同親猶戀舊城外青青寒草春

春鏡

寶鏡凌曙開含虛淨如水獨懸秦臺上萬象清光裏
豈慮高鑿偏但防流塵委不知娉婷色回照今何似
古劍

龍泉閑古匣苔蘚淪此地何意久藏鋒翻令世人棄
鐵衣今正澁寶刃猶可試儻遇拂拭恩應知剗犀利

舊井

舊井依舊城寒水深洞徹下看百餘尺一鏡光不滅
素綆久未垂清涼尚含潔豈能無汲引長訝君恩絕

白鷺

亭亭常獨立川上時延頸秋水寒白毛夕陽吊孤影
幽姿閑自媚逸翮思一騁如有長風吹青雲在俄頃

寒缸

向夕燈稍進空堂彌寂寞光寒對愁人時復一花落
但恐明見累何愁暗難托戀君秋夜永無使蘭膏薄

寄李侍御

舊國人未歸芳洲草還碧年年湖上亭悵望江南客
驄馬入關西白雲獨何適相思煙水外唯有心不隔
晚泊湘江懷故人

天涯片雲去遙指帝鄉憶惆悵增暮情瀟湘復秋色
扁舟宿何處落日羨歸翼萬里無故人江鷗不相識
過鄔三湖上書齋

何事東南客忘機一釣竿酒香開甕老湖色對門寒
向郭青山送臨池白鳥看見君能浪跡予亦厭微官
從軍 六首

迴首虜騎合城下漢兵稀白刃兩相向黃雲愁不飛
手中無尺鐵徒欲穿重圍
目極鴈門道青青邊草春一身事征戰匹馬同辛勤
末路成白首功歸天下人

倚劔白日暮望歸登戍樓北風吹羗笛此夜關山愁
迴首不無意滹河空自流

黃沙一萬里白首無人憐報國劔已折歸鄉身幸全
單于古臺下邊色寒蒼然

落日更蕭條北風動枯草將軍追虜騎夜失陰山道
戰敗仍樹勳韓彭但空老

秋草秋塞上望見漁陽郭胡馬嘶一聲漢兵淚雙落
誰爲吮瘡者此事今人薄

龍門八詠

秋山日搖落秋水急波瀾獨見魚龍氣長令煙雨寒

誰窮造化力空向兩岸看

水東渡

山葉傍崖赤千峰秋色多夜泉發清響寒渚生微波
稍見沙上月歸人爭渡河

福公塔

寂寞對伊水經行長未還東流自朝暮千載空雲山
誰見白鷗鳥無心洲渚間

遠公龕

松路向精舍花龕歸老僧閑雲隨錫杖落日低金繩
入夜翠微裏千峰明一燈

石樓

隱隱見花閣隔河映青林
水田秋鴈下山寺夜鍾深
寂寞群動息風泉清道心

下山

誰識往來意孤雲長自閑
風寒未渡水日暮更看山
木落衆峰出龍宮蒼翠間

水西渡

一作西渡水

伊水搖鏡光纖鱗如不隔
千龕道傍古一鳥沙上白
何事還一作山雲一作寒一作能留向城客

渡水

日暮下山來千山暮鍾發
不知波上棹還弄山中月
伊水連白雲東南遠明滅

月下聽砧

夜靜掩寒城清砧發何處
聲聲搗秋月腸斷盧龍戍
未得一作寄征人愁霜復愁露

送丘爲赴上都

帝鄉何處是岐路空垂泣
楚思愁暮多川程帶潮急
潮歸人不歸獨向空塘立

題大理黃主簿湖上高齋

閉門湖水畔自與白鷗親
竟日窓中岫終年林下人

俗輕儒服弊家厭法官貧多雨茅簷夜空洲草徑春
桃源君莫愛且作漢朝臣

平蕃曲 三首

吹角報蕃營迴軍欲洗兵已教清海外自築漢家城

其二

渺渺戍煙孤茫茫寒草枯隴頭那用閉萬里不防胡

其三

絕漠大軍還平沙獨戍閑空留一片石萬古在燕山

送鄭說之歙州謁薛侍郎

漂泊來千里謳謠滿百城漢家尊太守魯國重諸生

俗變人難理江傳水至清船經危石住路入亂山行

老得滄洲趣春傷白首情嘗聞馬南郡門下有康成

題獨孤使君湖上林亭

出樹倚朱闌吹鏡引上宮老農持鋤拜時稼捲簾看

水對登龍淨山當建隼寒夕陽湖草動秋色渚田寬

渤海人無事荊州客獨安謝公何足比來往古門難

酬李使君見贈

滿鏡悲華髮空山寄此身白雲家自有黃卷業長貧

懶任垂竿老狂因釀黍春桃花迷聖代桂樹狎幽人

幢蓋方臨郡柴荆忝作鄰但愁千騎至石路却生塵

送嚴維赴河南充嚴中丞幕府

久別邛溪客來乘使者軒
用才榮入幕扶病喜同樽
山展留何處江帆去獨翻
暮情辭鏡水秋夢識雲門
蓮府開花萼桃園寄子孫
何當舉嚴助徧沐漢朝恩
酬包諫議見寄之什

佐郡愧頑疎殊方親里閭
家貧寒未度身老歲將除
過雪山僧至依陽野客舒
藥陳隨遠宦梅發對幽居
落日棲鴉鳥行人遺鯉魚
高文不可和空愧學相如
棲霞寺東峰尋南齊明徵君故居

山人今不見山鳥自相從
長嘯辭明主終身卧此峰

泉源通石徑礪戶掩塵容
古墓依寒草前朝寄老松
片雲生斷壁萬壑遍疎鍾
惆悵空歸去猶疑林下逢
奉和趙給事使君留贈李婺州舍人兼謝舍人別駕之什

便道訪情親東方千騎塵
禁深分直夜地遠獨行春
絳闕辭明主滄洲識近臣
雲山隨候吏雞犬逐歸人
庭顧娑娑老邦傳蔽帝新
玄暉翻佐理聞到郡齋頻
行營酬呂侍御時尚書問罪襄陽軍次漢東境上侍御以州鄰寇賊復有水火迫於征稅詩

以見諭

不敢淮南卧來趨漢將營受辭瞻左鉞扶疾往前旌
井稅鶉衣樂壺漿鷓髮迎水歸餘斷岸烽至掩孤城
晚日歸千騎秋風合五兵孔璋才素健早晚檄書成
登遷仁樓訓壻李穆

臨風敞麗譙落日聽吹鏡歸路空迴首新章已在腰
非才受官謗無政作人謠儉歲安三五餘年寄六條
春蕪先楚國古樹過隋朝賴有東床客池塘免寂寥

別李氏女子

念爾嫁猶近稚年那別親臨岐方教誨所貴和六姻
俛首戴荆釵欲拜姿且嘖本來儒家子莫耻梁鴻貧

漢川若可涉水清石磷磷天涯遠鄉婦月下孤舟人
長沙早春雪後臨湘水呈同遊諸子

汀洲暖漸綠煙景淡相和舉目方如此歸心豈柰何
日華浮野雪春色染湘波北渚生芳草東風變舊柯
江山古思遠猿鳥暮情多君問漁人意滄浪自有歌

自道林寺西入石路至麓山

寺過法崇
禪師故居

山僧候谷口石路拂莓苔深入泉源去遙從樹杪回
香隨青靄散鍾過白雲來野雪空齋掩山風古殿開
桂寒知自發松老問誰栽惆悵湘江水何人更渡杯
和素郎中破賊後軍行過剡中山水謹上太尉

即李
光弼

剡路除荆棘王師罷鼓鼙農歸滄海畔
圖解赤城西
赦罪春陽發收兵太白低遠峰來馬首橫
笛入猿啼
蘭渚催新幄桃源識故蹊已聞開閣待誰許
卧東溪

送鄭十二還廬山別業

潯陽數畝宅歸卧掩柴關谷口何人待
一作門前秋

草閑忘機賣藥罷無語杖藜還舊筍
成寒竹空齋向

暮山水流經舍下雲去到人間
挂樹花應發因行寄

一攀

至饒州尋陶十七不在寄贈

謫宦投東道逢君已北轅孤蓬向何處
五柳不開門

去國空迴首懷賢欲訴冤梅枝看嶺嶠
竹路過湘源

月下高秋鴈天南獨夜猿離心與流水
萬里共朝昏

奉陪鄭中丞自宣州解印與諸姪宴餘干後谿

跡遠一作心遠親魚鳥功成厭鼓鼙林中阮生集

一作阮家醉池上謝公題戶牖垂藤合藩籬插槿齊

一作阮氏集本無此二句一作門徑蒼苔合窓陰

綠條低一作深巷行人少閑門卧柳低夕陽山向背


春一作秋草水東西度雨諸峰出看花幾路迷一作高

迷何勞問秦漢更入武陵谿後四句一本作舊架懸

不可到誰羨武陵溪塵一作煙

唐劉隨州詩集卷第

四



國家圖書館 NATIONAL CENTRAL LIBRARY TAIWAN, R.O.C.

唐劉隨州詩集卷之五

隨州刺史 劉長卿

同諸公袁郎中宴筵喜加章服

手詔來筵上腰金向粉闈
勳名傳舊閣蹈舞着新衣
白社同遊在滄洲此會稀
寒笳發後殿秋草送西歸
世難常摧敵時閑已息機
魯連功可讓千載一相揮
毗陵送鄒結先赴河南充判官

王事相逢少雲山奈別何
芳年臨水怨瓜步上潮過
客路方經楚鄉心共渡河
凋殘春草在離亂故城多
罷戰逢時泰輕徭佇俗和
東西此分手惆悵恨煙波

送徐大夫赴廣州

上將壇場拜南荒羽檄招遠人來百越元老事三朝
霧繞龍山暗山連象郡遙路分江淼淼軍動馬蕭蕭
盡角知秋氣樓船逐暮潮當令輸貢賦不使外夷驕

九日蔡國公主樓

主第人何在重陽客暫尋水餘龍鏡色雲罷鳳簫音
暗牖藏昏曉蒼苔換古今晴山卷幔出秋草閉門深
籬菊仍新吐庭槐尚舊陰年年畫梁燕來去豈無心

送荀、過山陰舊縣燕寄剡中諸官

訪舊山陰縣扁舟到海涯故林嗟滿歲春草憶佳期

晚景千峰亂晴江一鳥遲桂香留客處楓暗泊舟時
舊石曹娥篆空山夏禹祠剡谿多隱吏君去道相思

奉餞元侍郎加豫章採訪兼賜章服

時初州初

任重兼烏府時平偃豹韜澄清湘水變分別楚山高
花對彤襜發霜和白雪操黃金裝舊馬青草換新袍
嶺暗猿啼月江寒鷺映濤豫章生宇下無使翳蓬蒿

奉餞郎中四兄罷餘杭太守承恩加侍御史充

行軍司馬赴汝南行營

星使三江上天波萬里通權分金節重恩借鐵冠雄
梅吹前軍發棠陰舊府空殘春錦障外初日羽旗東

岸柳遮浮鷁江花隔避驄離心在何處芳草滿吳宮

送賈侍御克復後入京

一作江南送賈侍御入京

對酒心不樂見君動行舟回看暮帆隱獨向空江愁
晴雲淡初夜春塘深慢流溫顏風霜霽喜氣煙塵收
馳駟數千里朝天十二樓因云報親愛白髮生滄洲

會稽王處士草堂壁畫衡霍諸山

一本十四句故附增于內

粉壁

一作衡霍近群峰

一作如可攀

能令堂上客見

盡湖相

南山青翠數千仞

一作千

飛來方丈間歸

雲無處滅去鳥何時還勝事日相對主人常獨閑稍

看林壑晚

一作青陰蒲四壁

佳氣生重

關

一本增頗與宿心會看看慰急顏二

句

惠福寺與陳留諸官茶會

得西字

到此機事遣自嫌塵網迷因知萬法幻盡與浮雲齊
踈竹映高枕空花隨杖藜香飄諸天外日隱雙林西
傲吏方見狎真僧幸相携能令歸客意不復還東溪

金陵西泊舟臨江樓

蕭條金陵郭舊是帝王州日暮望鄉處雲邊江樹秋
楚雲不可託楚水只堪愁行客千萬里滄波朝暮流
迢迢洛陽夢獨卧清川樓異鄉共如此孤帆難久遊

題靈祐上人法華院木蘭花

其樹嶺南移植此地

庭種南中樹年華幾度新已依初地長獨發舊園春
映日成華蓋搖風散錦茵色空榮落處香醉往來人
菡萏千燈遍芳菲一雨均高柯儻爲楫渡海有良因
宿嚴維宅送包佶

江湖同避地分首自依依盡室今爲客驚秋空念歸
歲儲無別墅寒服羨隣機草色村橋晚蟬聲江樹稀
夜深宜共醉時難忍相違何事隨陽鴈汀洲忽背飛

送從弟貶袁州

何事成遷客思歸不見鄉遊兵經萬里弔屈向三湘
水與荆巫接山通鄢郢長名嗟黃綬繫身是白眉

獨結南枝恨應思北雁行憂來沽楚酒老鬢莫疑霜
無錫東郭送友人遊越

客路風霜曉郊原春興餘平蕪不可望遊子去何如
煙水乘湖闊雲山適越初舊都懷作賦古宄覓藏書
碑缺曹娥宅林荒逸少居江湖無限意非獨爲樵漁
送邵州判官往南

看君發原隰駟牡志皇皇始罷滄江令還隨粉署郎
海沂軍未息河兗歲仍荒征稅人全少榛蕪虜近亡
新知行宋遠相望隔淮長早晚裁書寄銀鈎佇八行

出豐縣界寄韓明府

迴首古原上未能辭舊鄉西風收暮雨隱隱分芒碭
賢友此爲邑令名滿徐方音容想在眼暫若升琴堂
疲馬顧春草行人看夕陽自非傳尺素誰爲論中腸

別陳留諸官

戀此東道主能令西上遲徘徊暮郊別惆悵秋風時
上國邈千里夷門難再期行人望落日歸馬嘶空陂
不愧寶刀贈維懷瓊樹枝音塵倘未接夢寐徒相思

觀李湊所畫美人障子

愛爾含天姿丹青有殊智無問已得象象外更生意
西子不可見千載無重還空令浣沙態猶在含毫間

一笑豈易得雙蛾如有情窓風不舉袖但覺羅衣輕
華堂翠幕春風來內閣金屏曙色開此中一見亂人
目只疑行到雲陽臺

送史判官奏事之靈武兼寄巴西親故

中州日紛梗天地何時泰獨有西歸心遙懸夕陽外
故人奉章奏此去論利害陽鴈南渡江征驂去相背
因君欲寄遠何處問親愛空使滄洲人相思減衣帶
自鄱陽還道中寄褚徵君

南風日夜起萬里孤帆樣元氣連洞庭夕陽落波上
故人煙水隔復此遙相望江信久寂寥楚雲獨惆悵

愛君清川口弄月時掉唱白首無子孫一生自踈曠

石梁湖離燕

故人千里道滄波十年別夜上明月樓相思楚天濶
蕭蕭清秋暮嫋嫋涼風發湖色淡不流沙鷗遠還滅
煙波日已遠音問日已絕歲晏空含情江臯綠芳歇

送沈少府之任淮南

惜君滯南楚枳棘徒棲鳳獨與千里帆春風遠相送
此行山水好時物亦應衆一鳥飛長淮百花滿雲夢
相期丹霄路遙聽清風頌勿爲州縣卑時來自爲用
嚴子瀨東送馬處直歸蘇州

聖君舟已遠落日潮未退日送滄海帆人行白雲外
江中遠回首波上生微靄秋色姑蘇臺寒流子陵瀨
相送苦易散動別知難會從此日相思空令減衣帶

宿懷仁縣南湖寄東海荀處士

向夕歛微雨晴開湖上天離人正惆悵新月愁嬋娟
佇立白沙曲相思滄海邊浮雲自來去此意誰能傳
一水不相見千峰隨客船寒塘起孤鴈夜色分鹽田
時復一延首憶君如眼前

初至洞庭懷灞陵別業

長安邈千里日夕懷雙闕已是洞庭人猶看灞陵月

誰堪去鄉意親戚想天末昨夜夢中歸煙波覺來潤
江臯見芳草孤客心欲絕豈訝青春來但傷經時別
長天不可望鳥與浮雲沒

題蕭郎中開元寺新構幽寂亭

康樂愛山水賞心千載同結茅依翠微伐木開蒙籠
孤峰倚青霄一徑去不窮候客石苔上禮僧雲樹中
曠然見滄洲自遠來清風五馬留谷口雙旌薄煙虹
沈沈衆香積眇眇諸天空獨往應未遂蒼生思謝公
同姜濟題裴式微餘干東齋

世事終成夢生涯欲半過白雲心已矣滄海意如何

藜杖全吾道榴花養太和春風騎馬醉江月釣魚歌
散秩看蟲蠹開門見雀羅遠山終日在芳草傍人多
吏體莊生傲方言楚俗訛屈平君莫吊腸斷洞庭波

贈元容州

擁旌臨合浦上印卧長沙海徼長無戍湘山獨種畬
政傳通歲貢才惜過年華萬里依孤劍千峰寄一家
累徵期旦暮未起戀煙霞避世歌芝草休官醉菊花
舊遊如夢裏此別是天涯何事滄波上漂漂逐海槎

夏口送長寧楊明府歸荆南因寄幕府諸公

關西楊太尉千載德猶聞白日俱終老清風獨至君

身承遠祖遺一作後才出衆人羣舉世貪荆玉全家戀
楚雲向煙帆杳杳臨水葉紛紛草覆招丘綠江從夏
口分高名光盛府異姓寵殊勲百越今無事南征欲
罷軍

奉和杜相公新移長興宅呈元相公

間世生賢宰同心奉至尊功高開北第機靜灌中園
入並蟬冠影歸分騎士喧窓聞漢宮漏家識杜陵源
獻替常焚橐優閑獨對萱花香逐荀令草色對王孫
有地先開閣何人不掃門江湖難自退明主託元元
湖南使還留辭辛大夫

王師勞近甸兵食仰諸侯天子無南顧元勲在上游
大才生間氣盛業極橫流風景隨搖筆山川入運籌
羽觴交餞席旄節對歸舟鶯識春深恨猿知日去愁
別離花寂寂南北水悠悠唯有家無國終身實所憂
泛曲阿後湖簡同遊諸公

元氣浮積水沉沉深不流春風萬頃綠映帶至徐州
爲客難適意逢君方暫遊黃緣白蘋際日暮滄浪舟
渡口微月進林西殘雨收水雲去仍濕沙鶴鳴相留
且習子陵隱能忘生事憂此中深有意非爲釣魚鉤

北遊酬孟雲卿見寄

忽忽忘前事事願能相乖衣馬日羸弊誰辨行與才
善道居貧賤潔服蒙塵埃行行無定止慄坎難歸來
慈母憂疾疢室家念棲菜幸君夙姻親深見中外懷
俟子惜時節悵望臨高臺

冬夜宿揚州開元寺烈公房送李侍御之江東

遷客投百越窮陰淮海凝中原馳困獸萬里棲饑鷹
寂寂連宇下愛君心自弘空堂來霜氣永夜清明燈
發後望煙水相思勞寢興暮帆背楚郭江色浮金陵
此去爾何恨近名予未能爐峰若便道爲訪東林僧

南楚懷古

南國久蕪沒我來空鬱陶君看章華宮處處生蓬蒿
但見陵與谷豈知賢與豪精魂托古木寶劍捐江臯
荷棹下晴景回舟隨晚濤碧雲暮冢落湖上秋天高
往事那堪問此心徒自勞獨餘湘水上千載聞離騷

上湖田館南樓憶朱晏

漂泊日復日洞庭今更秋白雲如有意萬里望孤舟
倚事愛成別空令登此樓天光映波動月影隨江流
鶴唳靜寒渚猿啼深夜洲歸期誠已促清景仍相留
頃者慕獨往爾來悲遠遊風波自此去桂水空離憂

送姚八之句容舊任便歸江南

一本作送姚八歸江南

故人還水國春色動離憂碧草千萬里滄江朝暮流
桃花迷舊路萍葉蕩歸舟遠戍看京口空城問石頭
折芳佳麗地望月西南樓後鳥共孤嶼煙波連數州
誰家過楚老何處戀江鷗尺素能相報湖山若箇憂

睢陽贈李司倉

白露變時候蒼聲暮啾啾飄飄洛陽客惆悵梁園秋
只為乏生計爾來成遠遊一身不家食萬事從人求
且喜接餘論足堪資小留寒城落日後砧杵令人愁
歸路歲時盡長河朝夕流非君深意願誰復能相憂
杪秋洞庭中懷亡道士謝太虛

漂泊日復日洞庭今更秋青楓亦何意此夜催人愁
惆悵客中月徘徊江上樓心知楚天遠日送滄波流
羽客久已歿微言無處求空餘白雲在容與隨孤舟
千里杳難望一身當獨遊故園復何許江海徒遲留

同郭參謀詠崔僕射淮南節度使廳前竹

參謀詠崔令
公憲前什

昔種梁王苑今移漢將壇一作不學媚消蒙籠低冕
過青翠捲簾看得地移根遠經霜抱節難開花成鳳
實嫩筍長魚竿藹藹軍容靜蕭蕭郡宇寬細音和角
暮踈影上門寒湘浦何年變山陽幾處殘一作阮巷
何人在梁

園幾處殘不知軒屏側歲晚對素安

硤石遇雨宴前主簿從兄子英宅

縣城蒼翠裏客路兩崖開硤石雲漠漠東風吹雨來
吾兄此為吏薄宦知無媒方寸抱秦鏡聲名傳楚材
折腰五斗間僂俛隨塵埃秩滿少餘俸家貧仍散財
誰言次東道暫預傾金釁雖欲少留此其如歸限催

江中晚釣寄荆南一二相識一作西江雨後憶荆南諸公

楚郭微雨收荆門遙一作在日漾舟水雲裏日暮春

江綠霽華靜洲渚暝一作色連松一作竹月出波上

時人歸渡頭宿一身已無累萬事更何欲漁父自夷

猶一作黃綠白鷗不羈束既憐滄浪水復一作愛滄浪曲

不見眼中人相思心斷續一作誰釣看世那知此生足

九日岳陽待黃遂張渙

別君頗已久離念與時積楚水空浮煙江樓望歸客
徘徊正佇想髮髯如暫覿心目徒自親風波尚相隔
青林泊舟處猿鳥愁孤驛遙見郭外山蒼然雨中夕
季鷹久踈曠叔度早疇昔反棹來何遲黃花候君摘

唐劉隨州詩集卷第五

唐劉隨州詩集卷第五



國家圖書館 NATIONAL CENTRAL LIBRARY TAIWAN, R.O.C.

唐劉隨州文集卷第六

隨州刺史劉長卿

題王少府堯山隱處簡陸鄱陽

故人滄洲吏深與世情薄解印二十年委身在丘壑
買田楚山下妻子自耕鑿群動心有營孤雲本無着
因收谿上釣遂接林中酌對酒春日長山村杏花落
陸生鄱陽令獨步建溪作早晚休此官隨君永棲託

晚次湖口有懷

靄然空水合目極平江暮南望天無涯孤帆落何處
頃為衡湘客頗見湖山一作趣潮氣和楚雲夕陽映

江樹帝鄉勞想望萬里心來去白髮生扁舟滄波滿
歸一作歸滿路秋風今已至日夜鴈南度木葉辭洞庭紛
紛落無一作不知數

陪元侍御遊支硎山寺

友公去已久寂寞龍華會古木閉空山蒼然暮相對
林巒非一狀水石有餘態密竹藏晦明群峰爭向背
峰峰帶落日步步入青靄香氣空翠中猿聲暮雲外
留連南臺客想像西方內因逐溪水還觀心兩無礙
桂陽西洲晚泊古橋村佳人

洛陽別離久江上心可得惆悵增暮情瀟湘復秋色

故山隔何處落日羨歸翼滄海空自流白鷗不相識
悲菴滿荆渚輟棹徒沾臆行客念寒衣主人愁夜織
帝鄉片雲去遙寄千里憶南路隨天長征帆杳無極
夕次擔石湖夢洛陽親故

天涯望不盡日暮愁獨去萬里雲海空孤帆向何處
寄身煙波裏頗得湖山趣江氣和楚雲秋聲亂楓樹
如何異鄉縣日復懷親故遙與洛陽人相逢夢中路
不堪明月裏更值清秋暮倚棹對滄波歸心共誰語

按覆後歸睦州贈苗侍御

地遠心難達天高謗易成羊腸留覆轍虎口脫餘生

直氏偷金枉于家，決獄明一言。知已重片議，殺身輕日下人。誰憶天涯客，獨行年光銷。塞步秋氣入，衰情建德知。何在長江問，去程孤舟百口渡。萬里一猿聲，落日開鄉路。空山向郡城，豈令冤氣積。千古在長平，奉寄婺州李使君舍人。

建隼罷鳴珂，初傳來暮歌。漁樵識太古，草樹得陽和。東道諸生從南依，遠客過天清。婺女出土厚，絳人多。永日空相望，流年復幾何。崖開當夕照，葉去逐寒波。眼暗經難受，身閑劍懶磨。似鴉占買，誰上馬試。庶頗窮分安，藜藿衰容勝。薜蘿只應隨，越鳥南翥託高柯。

哭魏兼遂

公及婦長幼子與僮數人相次亡歿葬於丹陽

古今俱此去，脩短竟誰分。樽酒空如在，絃琴肯重聞。一門同逝水，萬事共浮雲。舊館何人宅，空山遠客墳。艱危貧且共，少小秀而文。獨行依窮巷，全身出亂軍。歲時長寂寞，煙月自氛氲。壠樹隨人古，山門對日勳。汎舟悲向子，留劍贈徐君。來去雲陽路，傷心江水濱。負謫後登干越亭作又作十六句

天南愁望絕，亭上柳條新。落日獨歸鳥，孤舟何處人。

生涯投越嶺

一作嶺

傲世業陷胡邊

一作邊

塵杳杳，鍾陵暮悠。

悠鄙水春

一作江入千峯，春花連百越春。

秦臺悲白首，楚澤怨青蘋。

草色迷征路鶯聲傷逐臣一本無獨醒空雜一作取笑

直道不容身得罪風霜苦全生天地仁青山數行淚

滄海一窮鱗牢落機心盡惟一作空憐鷗鳥親

留題李明府霅溪水堂

寥寥一作寂寂此堂上幽意復誰論落日無玉事青山在

縣門雲峰向高枕漁釣入前軒晚竹疎簾影春苔雙

履痕荷香隨坐卧湖色映晨昏虛牖閑生白鳴琴靜

對言暮禽飛上下一作春水草帶清渾遠岸誰家

柳孤一作流煙何處村謫居投瘴癘離思過湘沅從此

扁舟去誰堪江浦猿

入白沙渚黃緣二十五里至石窟山下懷天台

陸山人

遠嶼一作渚靄將夕玩幽行自遲歸人不計日流水閑

相隨輟棹古崖口捫蘿春景遲偶因回舟一作次寧

與前山期對此瑤草色懷君瓊樹枝浮雲去寂寞白

鳥相因依何事愛高隱但令勞遠思窮年卧海嶠永

望愁天涯吾亦從此去扁舟何所之迢迢江上帆千

里東風吹

禪智寺上方懷演和尚寺即和尚所創

絕巘東林寺高僧惠遠公買園隋苑下持鉢楚城中

斗極千燈近煙波萬井通遠山低月殿寒木露花宮
紺宇焚香淨滄洲擺霧空鴈來秋色裏曙起早潮東
飛錫今何在蒼生待發蒙白雲翻送客庭樹自辭風
捨筏追閑士迴舟狎釣翁平生江海意惟共白鷗同
賈侍郎自會稽使迴篇什盈卷蕪蒙寄一首與

余有掛冠之期因書數事率成十韻

江上逢星使南來自會稽驚年一葉落按俗五花嘶
上國悲蕪梗中原動鼓輦報恩看鐵劍銜命出金閨
風物催歸緒雲峰發詠題天長百越外潮上小江西
鳥道通閩嶺山光落剡溪暮帆千里思秋夜一猿啼

栢樹榮新壠桃源憶故蹊若能爲休去行復草萋萋
秋日夏口涉漢陽獻李相公

日望衡門處心知漢水濱偶乘青雀舫還在白鷗群
間氣生靈秀先朝翼戴勲藏弓身已退焚藁事難聞
舊業成青草全家寄白雲松蘿長稚子風景逐新文
山帶寒城出江依古岸分楚歌悲遠客羗笛怨孤軍
鼎罷調梅久門看種藥勤十年猶去國黃葉又紛紛
歸沛縣道中晚泊留侯城

訪古此城下子房安在哉白雲去不反危堞空崔嵬
伊昔楚漢時頗聞經濟才運籌風塵下能使天地開

蔓草日已積長松日已摧功名滿青史祠廟唯蒼蒼
百里暮程遠孤舟川上迴進帆東風便轉岸前山來
楚水澹相引沙鷗閑不猜扣舷從此去延首仍裴回

關門望華山

客路瞻太華三峰高際天夏雲亘百里合沓遙相連
雷雨飛半腹太陽在其巔翠微關上近一作瀑布林
稍懸愛此衆容秀能令西望徧徘徊忘暝色泱泱成
陰煙曾是朝百靈亦聞會群仙瓊漿豈易挹毛女非
空傳髣髴仍佇想幽竒如眼前金天有青廟松栢隱
蒼然

奉陪蕭使君入鮑達洞尋靈山寺

山居秋更鮮秋江相映碧獨臨滄洲路如待掛帆客
遂使康樂侯披榛着雙屐入雲開嶺道永日尋泉脉
古寺隱青冥空中寒磬夕蒼苔絕行徑飛鳥無去跡
樹杪下歸人水聲過幽石任情趣逾遠移步竒屢易
蘿木靜蒙蒙風煙深寂寂徘徊未能去畏共桃源隔
孫權故城下懷古兼送友人歸建業

雄圖爭割據神器終不守上下武昌城長江竟何有
占來壯臺榭事往悲陵阜窳落幾家人猶依數株柳
威靈絕想像蕪沒空林藪野徑春草中郊扉夕陽後

逢君從此去背楚方東走煙際指金陵潮時過湓口
行人已何在臨水徒揮手惆悵不能歸孤帆沒雲久

宿雙峰寺寄盧七李十六

寥寥禪誦處滿室虫絲結罔與山中人無心生復滅
徘徊雙峰下惆悵雙峰月白日香暮猿深蒼蒼古松列
玩竒不可盡漸遠更幽絕林杳暗僧獨歸石寒泉且咽
竹房響輕吹蘿徑陰餘雪引澗曉何遲背巖春未發
此遊誠多趣獨往共誰閱但得意空自歸非若豈能說

京口懷洛陽舊居兼寄廣陵二三知己

川闊悲無梁藹然滄波夕二八涯一飛鳥日暮南徐客

氣混京口雲潮吞海門石孤帆候風進夜色帶江白

一水阻佳期相望空脉脉那堪歲芳盡更使春夢積

故國一作胡塵飛遠故一作山楚雲隔家人想何在庭

草為誰碧惆悵空傷情滄浪必有餘一作遺跡嚴陵七里

灘携手同所適

登揚州西巖寺塔

北塔凌空虛雄觀歷川澤亭亭楚雲外千里看不隔
遙對黃金臺浮輝亂相射盤梯接元氣半壁棲夜魄
稍登諸劫盡若騁排霄翮向是滄洲人已為青雲客
雨飛千栱霽日在萬家夕鳥處高却低天涯遠如迫

江臨入空翠海嶠現微碧向暮期下來誰堪復行後

湖上遇鄭田

故人青雲器何意常窘迫三十猶布衣憐君頭已白
誰言此相見暫得話疇昔舊業今已蕪還鄉返為客
扁舟伊獨往斗酒君自適滄洲一作海不可涯孤帆去
無跡杯中忽復醉湖上生月一作新颯颯江色寒濛
濛水雲夕風波易迢遞千里如咫尺廻首人已遙南
看楚天隔

雨中登沛縣樓贈表兄郭少府

楚澤秋更遠雲雷有時作晚陂帶殘雨白水昏漠漠

佇立收煙氛洗然靜東一作東廓卷簾高樓上萬里看

日落為客頻改絃辭家尚如昨故山今不見此一作北

鳥那可託小邑務常閑吾兄宦何薄高標青雲器獨

立滄江鶴惠愛原上情慙慙丘中諾何當遂良願歸

卧青山廓

灞東晚晴簡同行薛棄朱訓

客心豁初霽霽色暝玄灞西向看夕陽曛曛映桑柘
二資誠逸足千里陪征駕古樹軹道傍人煙杜陵下
伊余在羈束且復隨造化好道當有心榮生苦無暇
高賢幸茲偶英達窮王霸迢遞客王程徘徊主人夜

一薰知異質片玉誰齊價同結丘中緣塵埃自茲謝
對雨贈濟陰馬少府考城蔣少府兼獻成武五

兄南華二兄

繁雲蕪家思彌望連濟北日暮微雨中州城帶秋色
蕭條主人靜落葉飛不息鄉夢寒更頻蟲聲夜相逼
二賢縱橫器久滯徒勞職笑語和風騷雍容事文墨
五兄即時彥前路良未測秋水百丈清寒松一枝直
此心欲引託誰爲生羽翼且復頓歸鞍杯中雪胸臆
李侍御河北使迴至東京相訪
故人南臺秀風擅中朝美擁傳從北來飛霜日千里

貧居幸相訪顧我門裏却訝繡衣人仍交布衣士
王程遽爾迫別戀此始濁酒未暇斟清文頗垂示
迴瞻驄馬速但見塵起日暮汀洲寒春風渡流水
草色官道邊桃花御溝裏天涯一鳥夕惆悵知何已
吳中聞潼關失守因奉寄淮南蕭判官

一鴈飛吳天羈人傷暮律松江風嫋嫋波上片帆疾
木落姑蘇臺霜收洞庭橘蕭條長洲外唯見寒山出
胡馬嘶秦雲漢兵亂相失關中因竊據天下共憂慄
南楚有瓊枝相思怨瑤瑟一身寄滄洲萬里看白日
赴敵甘負戈論兵勇投筆臨風但攘臂擇木將委質

不如歸遠山雲卧飯松栗

哭張員外經

慟哭鍾陵下東流與別離二星來不返雙劍沒相隨
獨繼先賢傳誰刊有道碑故園荒峴曲旅櫬寄天涯
白簡曾連拜滄洲每共思撫孤憐齒穉歎逝顧身衰
泉壤成終古雲山若在時秋風隣笛發寒日寢門悲
世難愁歸路家貧緩葬期舊賓傷未散夕臨咽常遲
自此辭張邵何由見戴逵獨聞山吏部流涕訪孤兒

登東海龍興寺高頂望海簡演公

胸山壓海口永望開禪宮元氣遠相合太陽生其中

豁然萬里餘獨爲百川雄白波走雷電黑霧藏魚龍
變化非一狀晴明分衆容煙開秦帝橋隱隱橫殘虹
蓬島如在眼羽人那可逢偶聞真僧言甚與靜者同
幽意頗相愜賞心殊未窮花間午時梵雲外春山鍾
誰念遽成別自憐歸所從他時相憶處惆悵西南峰
奉送從兄罷官之淮南

何事浮溟渤元戎棄鎮鄒漁竿吾道在鷗鳥世情賒
玄髮他鄉換滄洲此路遐沂公隨桂檝醒醉任松華
離別誰堪道艱危更可嗟兵鋒搖海內王命隔天涯
鍾漏移長樂衣冠接永嘉還當拂氛祲那復卧雲霞

溪路漫岡轉夕陽歸鳥斜萬艘江縣郭一樹海人家
揮袂看朱紱揚帆指白沙春風獨迴首愁思極如麻
落第贈楊侍御兼拜員外仍充安大夫判官赴

范陽

職副旌旄重才兼識量通使車遙肅物邊策遠和戎
擲地金聲著從軍寶劍雄官成稽古力名達濟時功
肅穆烏臺上雍容粉署中含香初待漏持簡舊生風
黠吏偏驚隼貪夫輒避驄且知榮已隔誰謂道仍同
念舊追連茹謀生任轉蓬泣連三獻玉瘡懼再傷弓
戀土函關外瞻塵灞水東他時書一札猶冀問途窮

貶南巴至鄱陽題李嘉祐江亭

又作二
十句

巴嶠南行遠一作南出長江萬里隨不才甘謫去流

水亦何之地遠明君棄一作瘴近天高酷吏欺青山

獨往路芳草未歸時流落還相見悲懽話所思猜嫌

一作傷惹苾愁暮向江離柳色迎高塢荷衣照下帷

一本無水雲初起重暮鳥遠來遲白首一作看長劍

滄洲一作寄釣絲沙鷗驚小吏湖月上高枝一本無

稚子能吳語新文怨楚辭憐君不得意川谷自逶迤

一作容髮
老南枝

自紫陽觀至華陽洞宿侯尊師草堂簡同遊李

延年

石門媚煙景句曲盤江一作甸南向佳氣濃數峰遙
隱見漸臨華陽口雲路入葱蒨七曜懸洞宮五雲抱
仙殿銀函竟誰發金液徒堪薦千載空桃花秦人深
不見東溪喜相遇貞白如會面青鳥來去閑紅霞朝
夕變一從換仙骨萬里乘飛電蘿月延步虛松花醉
閑宴幽人即長往茂宰應交戰明發歸琴堂知君懶

為縣

石門一作石林

唐劉隨州詩集卷第六



唐劉隨州詩集卷第七

隨州刺史劉長卿

奉使新安自桐廬縣經嚴陵釣臺宿七里灘下
寄使院諸公

悠然釣臺下懷古時一望江水自潺湲行人獨惆悵
新安從此始桂檝方蕩漾迴轉百里間青山千萬狀
連崖去不斷對嶺遙相向夾岸黛色愁沉沉綠波上
夕陽留古木水鳥拂寒浪月下扣船聲煙中採菱唱
猶憐負羈束未暇依清曠牽役徒自勞近名非所向
何時故山裏却醉松花釀迴首唯白雲孤舟復誰訪

題武丘寺

青林虎丘寺林際翠微路仰一作見山僧來遙從飛

鳥處一作去茲峰論寶玉千載唯丘墓埋劍人空傳鑿

山龍已去捫蘿披翳薈路轉夕陽遠虎嘯崖谷寒猿

鳴杉一作杜松暮徘徊北樓上江海窮一顧日映千里

帆鷗歸萬家樹斲因愜所適果得捐外慮庭暗棲閑

雲簷香滴甘露久迷空寂理多為繁華故永欲投死

生餘生豈能誤

奉餞鄭中丞罷浙西節度還京

天上移將星元戎罷龍節三軍含怨慕橫吹聲斷絕

五馬嘶城隅萬人卧車轍滄洲浮雲暮杳杳去帆發

迴首不問家歸心遙向闕煙波限吳楚日久事淮越

吊影失所依側身隨下列孤蓬飛不定長劍光未滅

綠綺為誰彈綠芳堪自擷悵然江南春獨此湖上月

千里懷去思百憂變華髮頌聲滿江海今古流不竭

送裴四判官赴河西軍試

吏道豈易愜如君誰與儔逢時將騁驥臨事無全牛

鮑叔幸相知田蘇頗同遊英資挺孤秀清論含古流

出塞佐持簡辭家擁鳴騶憲臺貴公舉幕府資良籌

武士佇明試皇華難久留陽關望天盡洮水令人愁

萬里看一鳥曠然煙霞收晚花對古戍春雪含邊州
道路雖暫隔音塵那可求他時相望處明月西南樓
旅次丹陽郡遇康侍御宣慰召募燕別岑單父
客心暮千里迴首煙花繁楚水瘦歸夢春江連故園
羈人懷上國驕虜窺中原胡馬暫爲害漢臣多負恩
羽書晝夜飛海內風塵昏雙鬢日已白孤舟心且論
繡衣從此來汗馬宣王言憂憤激忠勇悲歡動黎元
南徐爭赴難發卒如雲屯倚劔看太白洗兵臨海門
故人亦滄洲少別堪傷魂積翠下京口歸潮落山根
如何天外帆又此波上樽空使憶君處鶯聲催淚痕

客舍贈別韋九建赴任河南韋十七造赴任鄭

縣便觀省

與子頗疇昔常時仰英髦弟兄盡公器詩賦凌風騷
頃者遊上國獨能光選曹香名冠二陸精鑿逢山濤
且副倚門望莫辭趨府勞桃花照絲服草色連青袍
征馬臨素滄離人傾濁醪華山微雨霽祠上殘雲高
而我倦棲屑別君良鬱陶春風亦未已旅思空滔滔
拙分甘棄置窮居長蓬蒿人生未鷓化物議如鴻毛
迢遞兩鄉別殷勤一寶刀清琴有古調更向何人操

送元八遊汝南

元生實竒邁幸此論疇昔刀筆素推高鋒銜久無敵
縱橫濟時意跌宕過人蹟破產供酒錢盈門皆食客
田園頃失計資用深相迫生事誠可憂嚴裝遠何適
世情薄恩義俗態輕窮厄四海金雖多其如向人情
迢遞朗陵道悵望都門夕向列伊水南行看楚雲隔
繁蟬動高柳疋馬嘶平澤潢潦今正深陂湖未澄碧
人生不得已自可甘形役勿復樽前酒離居剩悽戚
奉和李大夫同呂評事太行苦熱行兼寄院中

諸公仍呈王員外

迢遞太行路自古稱險惡千騎儼欲前群峰望如削

火雲從中出仰視飛鳥落汗馬卧高原危旌倚長薄
清風竟不至赤日何煎鑠石枯山木樵鱗窮水泉涸
九重今旰食萬里傳明略諸將候軒車元凶愁鼎鑊
何勞短兵接自有長纓縛通越事豈難渡瀘功未博
朝辭羊腸阪夕望貝丘郭漳水斜遠營常山遙入幕
永懷姑蘇下遙寄建安作白雪和難成滄波意空託
陳琳書記說王粲從軍樂早晚歸漢廷隨公上麟閣
洛陽主簿叔知和驛承恩赴選伏辭一首

仲父王佐材屈身仇香位一從理京劇萬事皆容易
則知無不可通變有餘地器宇溟渤寬文鋒鏌錮利

憧憧洛陽道日夕皇華使二載出江亭一心奉王事
功成良可錄道在知無愧天府留香名銓闈就明試
賦詩皆舊友攀轍多新吏綵服辭高堂青袍擁征騎
此行季春月時物正鮮媚官柳陰相連桃花色如醉
長安想在目前路遙髮鬢落日看華山關門逼青翠
行瞻稍已隔結戀無能慰誰念樽酒間徘徊竹林意

題宛句宋少府廳留別

宋侯人之秀獨步南曹吏世上無此才天生一公器
尚甘黃綬屈未適青雲意洞澈萬頃陂昂藏千里驥
從宦聞苦節應物推高誼薄俸不自資傾家共人費

顧予倦棲託終日憂窮匱開口即有求私心豈無與
幸逢東道主因輟西征騎對話堪息機披文欲忘味
壺觴招過客几案無留事綠樹映層城蒼苔覆閑地
一言重然諾累夕陪宴慰何意秋風來颯然動歸思
留歡殊自愜去念能爲累草色愁別時楓花落行次
臨岐仍把手此會良不易他日瓊樹枝相思勞夢寐
罷攝官後將還舊居留辭李侍御

江海今爲客風波失所依白雲心已負黃綬計仍非
累辱群公薦頻霑一尉微去綵焚玉石來爲采葑菲
州縣名何在漁樵事亦違故山桃李月初服薜蘿衣

熊軾分朝寄龍韜解賊圍風謠傳吏體雲物助兵威
白雪飄辭律青春發禮闈引軍橫吹動授翰捷書揮
草映蠶管綠花臨檄羽飛全吳亟轉戰在虜怯知機
憶昨趨金節臨時廢玉徽俗流應不厭靜者或相譏
世難慵干謁時閑喜放歸潘郎悲白髮謝客愛清輝
樗散材因棄交親迹已稀獨愁看五柳無事掩雙扉
世累多行路生涯向釣磯傍車溪水碧家羨者田肥
旅食傷飄梗嚴棲憶水菽悠然獨歸去迴首望旌旗
贈別于群後筆赴安西

風流一才子經史仍滿腹心鏡萬象生文鋒衆人服
頃遊靈臺下頻棄荆山玉蹭蹬空數年徘徊冀微祿
竭來投筆硯長揖謝親族且欲圖變通安能守拘束
本持鄉曲譽肯料泥塗辱誰謂命迤邐還令計反覆
西戎今未弭胡騎屯山谷坐恃龍豹韜全輕蜂蠆毒
拂衣從此去擁傳一何速元帥許提携他人佇瞻矚
出門寡儔侶矧乃無僮僕點虜時相逢黃沙暮愁宿
蕭條遠迴首萬里如在目漢境天西窮湖山海邊綠
想聞羌笛處淚盡關山曲地濶烏道遲風寒馬毛縮
邊愁如浩蕩離思空斷續塞上歸限賒樽前別期促
知君志不小一舉凌鴻鵠且願樂從軍功名正殊俗

送薛據宰涉縣

自不棄主簿陟狀
尋復選受此官

故人河山秀獨立風神異人許白眉長天資青雲器
雄辭變文名高價喧時議下筆盈萬言皆合古人意
一從負能名數載猶卑位寶劍誠可用烹鮮是虛棄
昔聞在河上高卧自無事几案終日閑蒲鞭使人畏
頃因歲月滿方謝風塵吏頌德有與人薦賢逢八使
棲鸞往已屈馴雀今可嗣此道如不移雲霄坐應致
縣前渾水綠郭外晉山翠日得謝客遊時堪陶令醉
前期今尚遠握手空宴慰驛路踈柳長春城百花媚
徘徊白日隱暝色含天地一鳥向灞陵孤雲送行驛

夫君多述作而我常諷味賴有瓊瑤資能寬別離思
槐陰覆堂殿苔色上階砌鳥倦自歸飛雲閑獨容澹
既將慕幽絕兼欲看定慧遇物忘世緣還家懶生計
無生妄已息有妄心可制心鏡常虛明時人自淪翳
早春贈別趙居士還江左時長卿下第歸嵩陽

舊居

見君風塵裏意出風塵外自有滄洲期含情十餘載
深居鳳城曲日預龍華會果得僧家緣能遺俗人能
一身今已適萬物知何愛悟法電已空看心水無礙
且將窮妙理兼欲尋勝槩何獨謝客遊當爲遠公輩

放舟馳楚郭負杖辭秦塞日送南飛雲令人想吳會
遙思舊遊處髣髴疑相對夜火金陵城春煙石頭瀨
滄波極天末萬里明如帶一片孤客帆飄然向青靄
楚天合江氣雲色常霍靄隱見湖中山相連數州內
君行意可得全與時人背歸路隨楓林還鄉念尊菜
顧予尚羈束何幸承眄睐素願徒自勤清機本難逮
累幸忝賓薦末路逢沙汰漭落名不成徘徊意空大
逢時雖貴達守道甘易退逆旅鄉夢頻春風客心碎
別君日已遠離念無明晦予亦反柴荆山田事耕耒
夜宴洛陽程九主簿宅送楊三山人往天台尋

智者禪師隱居

東林問逋客何處棲幽偏滿腹萬餘卷息機二十年
志圖良已久鬢髮空蒼然調嘯寄踈曠形骸如棄捐
本家關西族別業嵩陽田雲卧能獨往山棲幸周旋
垂竿不在魚賣藥不為錢藜杖閑倚壁松花常醉眠
頃辭青溪隱來訪赤縣仙南畝自甘賤中朝唯愛賢
仍空世諦法遠結天台緣魏闕從此去滄洲知所便
主人瓊枝秀寵別瑤華篇落日掃塵榻春風吹客船
此行頗自適物外誰能牽弄棹白蘋裹掛帆飛鳥邊
落潮見孤嶼徹底觀澄漣鴈過湖上月猿聲峰際天

群峰趨海嶠千里黛相連遙倚赤城上曛暉初日圓
昔聞智公隱此地常安禪千載已如夢一燈今尚傳
雲龕閉遺影石窟無人煙古寺暗喬木春崖鳴細泉
流塵既寂寞縹緲想增嬋娟山鳥悲庭樹門人思步蓮
夷猶懷永路長望臨清川漁人來夢裏沙鷗飛眼前
獨遊豈易感群動多相纏羨爾五湖夜往來閑扣船

瓜洲罷奉錢張侍御公拜膳部郎中却復憲臺
充賀蘭大夫留後使之嶺南時侍御先在淮

南幕府

太華高標峻青陽淑氣盤屬辭傾渟解稱價掩琅玕

楊葉頻推中苦香早拜官後來慚轍跡先達仰門闈
佐劇勞黃綬提綱疾素餐風生趨府步筆偃觸邪冠
滑鯁知難屈鋒鏦豈易干佇將調玉鉉翻自落金丸
異議那容直專權本畏彈寸心寧有負三黜竟無端
適喜鴻私降旋驚羽檄攢國憐朝市易人怨虎狼殘
天地龍初見風塵虜未殫隨川歸少海就日背長安
副相榮分寄輸忠義不刊擊胡馳汗馬遷蜀扈鳴鑾
月罷名卿署星懸上將壇三軍搖旆出百越畫圖觀
茅茹能相引泥沙肯再蟠兼榮知任重交辟許才難
勁直隨臺柏芳香動省蘭璧從全藉去鵬自北溟搏

星象銜新寵風霜帶舊寒是非生倚伏榮辱繫悲歡
疇昔偏殊眄屯蒙獨永歎不才成擁腫失計似邯鄲
江國傷移律家山憶考槃一為鷗鳥誤三見露華團
迴首青雲裏應憐濁水瀾愧將生事托羞向鬢毛看
知己傷愆素他人自好丹絃春連楚越旅宿寄風湍
世路東流水滄江一釣竿松聲伯禹穴草色子陵灘
度嶺情何遽臨流興未闌梅花分路遠楊子上潮寬
夢想懷依倚煙波限渺漫且愁無去鴈寧冀少迴鸞
極浦春帆迥空郊晚騎單獨憐南渡月今夕送歸鞍
至德三年春正月時謬蒙差攝海鹽令聞王師

收二京因書事寄上浙西節度李侍郎中丞
行營五十韻

天上胡星孛人間一作東山反氣橫風塵生汗馬河洛縱
長鯨本謂一作爲才非據誰知一作防禍已萌食參將可
待誅錯輒爲名萬里兵鋒接三時羽檄驚負恩殊烏
獸流毒遍黎氓朝市成蕪沒干戈起戰爭人心懸反
覆一作覆載天道暫虛盈略地侵中土傳烽到上京王師
陷虜魅帝座逼撓搶渭水嘶胡馬秦山泣漢兵關原
馳萬騎煙火亂千甍鳳駕瞻西幸龍樓議一作向北征
自將行破竹誰學去吹笙白日重輪慶玄穹再造榮

鬼神潛釋一作蓄

憤夷狄

遠輸誠海內戎衣卷關中賊

壘平山川隨轉戰草木困一作助

橫行區宇

神功立謳

歌一作謠

帝業成天迴萬象慶龍見五雲迎小苑春猶

在長安日更明星辰歸正位一作路

雷雨發

殘生文物

登前古蕭韶下太清未央新柳色長樂舊鐘聲八使

推邦彥中司案國程蒼生屬伊呂明主仗一作伏

韓彭

兇醜將除蔓奸蒙已負荆世危看柱石時難識忠貞

薄伐徵貔虎長驅擁旄旌吳山依重鎮江月帶行營

金石懸詞律煙雲動筆精運籌初戒竈調鼎未和羹

北虜傳初解東人望已傾池塘催謝客花木待春卿

昔忝登龍首能傷困驥鳴艱難悲伏一作仗

劍提握喜

懸衡巴曲誰堪聽秦臺自有情遠令辭短褐仍欲請

長纓久客田園廢初官印綬輕榛蕪上國路苔蘚北

山楹懶慢羞趨府驅馳憶退一作近

耕榴花

無暇醉蓬

髮帶愁縈地僻方言異身微俗慮一作累

并家憐雙鯉

斷才媿小鱗烹滄海今猶滯青陽歲又更洲香生杜

若谿煖一作遠

戲鷓鴣

煙水一作雪

宜春候

塞關一作開

值

晚晴潮聲來萬井山色映孤城旅夢覩喬木歸心亂

早鶯倘無知已在今已訪蓬瀛

唐劉隨州詩集卷第七

國家圖書館, NATIONAL CENTRAL LIBRARY, TAIWAN, R.O.C.



唐劉隨州詩集卷第八

尋張逸人山居

隨州刺史劉長卿

危石纔通鳥道空
山更有人家桃源定在深處澗
水浮來落花

發越州赴潤州使院留別鮑侍御

對水看山別離孤舟日暮行
遲江北江南春草獨向金陵去時

送陸澧還吳中

瓜步寒潮送客楊柳暮雨沾衣故
山南望何處秋草

連天獨歸

茗溪酬梁耿別後見寄

清川未路何極

一作清溪落日

落日一作惆悵孤舟解携鳥向

一作鳥去

平蕪遠近人隨流水東西白雲千里萬里明月

前溪後溪惆悵

一作獨恨

長沙謫去江潭芳

一作春

草萋萋

蛇浦橋下重送嚴維

秋風颭颭鳴條風月相和寂寥黃葉一離一別青山

暮暮朝朝寒江漸出高岸古木猶依斷橋明日行人

已遠空餘淚滴迴潮

七里灘重送

秋江渺渺水空波越客孤舟欲榜歌手折衰楊悲老大故人零落已無多

家園瓜熟是故蕭相公所遺瓜種悽然感舊因

賦此詩

事去人亡跡自留黃花綠帶不勝愁誰能更向青門外秋草茫茫覓故侯

重送張郎中貶吉州

猿啼客散暮江頭人自傷心水自流同作逐臣君更遠青山萬里一孤舟

尋盛禪師蘭若

秋草黃花覆古阡
隔林何處起人煙
山僧獨在山中
老唯有寒松見少年

寄許尊師

獨上雲梯入翠微
蒙蒙煙雪映巖扉
世人知在中峰
裏遙禮青山恨不歸

酬李穆見寄

孤舟相訪至天涯
萬轉雲山路更賒
欲掃柴門迎遠
客青苔黃葉滿貧家

送王司馬秩滿西歸

漢主何時放逐臣
江邊幾度送歸人
同官歲歲先辭

滿唯有青山伴老身

寄別朱拾遺

天書遠召滄浪客
幾度臨岐病未能
江海茫茫春欲
遍行人一騎發金陵

會赦後酬主簿所問

江南海北長相憶
淺水深山獨掩扉
重見太平身已
老桃源久住不能歸

贈秦系

向風長嘯戴紗巾
野鶴由來不可親
明日東歸變名
姓五湖煙水覓何人

酬靈徹公相招

石磧泉聲久不聞，獨臨長路雪紛紛。如今漸欲生黃髮，願脫頭冠與白雲。

贈崔九載華

憐君一見一悲歌，歲歲無如老去何。白屋漸看秋草沒，青雲莫道故人多。

同崔載華贈日本聘使

憐君異域朝周遠，積水連天何處通。遙指來從初日外，始知更有扶桑東。

送建州陸使君

漢庭初拜建安侯，天子臨軒寄所憂。從此向南無限路，雙旌已去水悠悠。

送秦侍御外甥張篆之福州謁鮑大夫秦侍御

與大夫有舊

萬里閩中去渺然，孤舟水上入寒煙。轅門拜首儒衣弊，貌似牢之豈不憐。水一作海

聞奉迎皇太后使沈判官至因有此作

長樂宮人掃落花，君王正候五雲車。萬方臣妾同瞻望，疑在曾城阿母家。

送劉萱之道州謁崔大夫

沅水悠悠湘水春
臨岐南望一沾巾
信陵門下三千
客君到長沙見幾人

過鄭山人所居

寂寂孤鶯啼杏園
寥寥一犬吠桃源
落花芳草無尋
處萬壑千峰獨閉門

奉送賀若郎中賊退後之杭州

江上初收戰馬塵
鶯聲柳色待行春
雙旌誰道來何
暮萬井如今有幾人

瓜洲驛重送梁郎中赴吉州

渺渺雲山去幾重
依依獨聽廣陵鐘
明朝借問南來

客五馬雙旌何處逢

奉使鄂渚至烏江道中作

滄洲不復戀魚竿
白髮那堪帶鐵冠
客路向南何處
是蘆花千里雪漫漫

新息道中作

蕭條獨向汝南行
客路多逢漢騎營
古木蒼蒼離亂
後幾家同住一孤城

春日宴魏萬成水湘亭

何年家住此江濱
幾度門前北渚春
白髮亂生相顧
老黃鶯自語豈知人

重送道標上人

衡陽千里去人稀
遙逐孤雲入翠微
春草青青新覆地
深山無路若爲歸

送李判官之潤州行營

萬里辭家事鼓鼙
金陵驛路楚雲西
江春不肯留歸客
草色青青送馬蹄

將赴南巴至餘干別李十二

江上花催問禮人
鄱陽鶯報越鄉春
誰憐此別悲歡異
萬里青山送逐臣

時平後春日思歸

一房何曾及布衣
時平却憶卧柴扉
故園柳色催南客
春水桃花待北歸

送陶十赴杭州攝掾

莫歎江城一掾卑
涪洲未是阻心期
浙中山色千萬狀
門外潮聲朝暮時

使還七里瀨上逢薛承規赴江西貶

遷客歸人醉晚寒
孤舟暫泊子陵灘
憐君更去三千里
落日青山江上看

使廻赴蘇州道中作

春風何事遠相催
路盡天涯始却迴
萬里無人空楚

水孤帆送客到魚臺

昭陽曲

昨夜承恩宿未央
羅衣猶帶御衣香
芙蓉帳小雲屏暗
楊柳風多水殿涼

罪所留繫每夜聞長洲軍笛聲

白日浮雲閉不開
黃沙誰問冶長猜
只憐橫笛關山月
知處愁人夜夜來

贈微上人

禪門來往翠微間
萬里千峰在剡山
何時共到天台
表身與浮雲處處閑

東湖送朱逸人歸

山色湖光併在東
扁舟歸去有樵風
莫道野人無外事
閒田鑿井白雲中

舟中送李十八

釋子身心無有分
獨將衣鉢去人羣
相思晚望西林寺
唯有鐘聲出白雲

送李穆歸淮南

揚州春草新年綠
未去先愁去不歸
淮水問君來早晚
老人偏畏過芳菲

觀李湊所畫美人障子

華堂翠幙春風來內閣金屏曙色開此中一見亂人
眼只疑行到雲陽臺

送盧侍御赴河北

謫居爲別倍傷情何事從戎獨遠行千里按圖收故
地三軍罷戰及春耕江天渺渺鴻初去漳水悠悠草
欲生莫學仲連逃海上田單空媿取聊城

送子婿崔真父歸長城

送君卮酒不成懽幼女辭家事伯鸞桃葉宜人誠可
詠柳花如雪若爲看心憐稚齒鳴環去身媿衰顏對
玉難惆悵暮帆何處落青山無限水漫漫

送陸豐倉曹西上

長安此去欲何依先達誰當薦陸機日下鳳翔雙闕
迴雪中人去二陵稀舟從故里難移棹家住寒塘獨
掩扉臨水自傷流落久贈君空有淚沾衣

送柳使君赴袁州

宜陽出守新恩至京口因家始願違五柳閉門高士
去三苗按節遠人歸月明江路聞猿斷花暗山城見
吏稀惟有郡齋窓裏岫朝朝空對謝玄暉

戲題贈二小男

異鄉流落頻生子幾許悲歡併在身欲並老容羞白

髮每看兒戲憶青春未知門戶誰堪主且免琴書別
與人何幸暮年方有後舉家相對却沾巾

謫官後卧病官舍簡賀蘭侍郎

一作貶陸州
祖庸見贈

青春衣繡共稱

一作繡服
正相

宜白首垂

一作髮如

絲恨不遺江

上幾回今夜月鏡中無復少年時生還北闕誰相一作

將一作能

引老向南邦衆所悲歲歲任他芳草綠長沙未

有定歸期

歲日見新曆因寄都官裴郎中

青陽振螢初頒曆白首銜冤欲問天絳老更能經幾
歲賈生何事又三年愁占蒼草終難決病對椒花倍

自憐若道平分四時氣南枝爲底發春偏

江州重別薛六柳八二員外

生涯豈料承優詔世事空知學醉歌江上月明胡鴈
過淮南木落楚山多寄身且喜滄洲近顧影無如白
髮何今日龍鍾人共棄媿君猶遣慎風波

青溪口送人歸岳州

洞庭何處鴈南飛江蒹蒼蒼客去稀帆帶夕陽千里
沒天連秋水一人歸黃花裊露開沙岸白鳥嚙魚上
釣磯岐路相逢無可贈老年空有淚沾衣

送靈澈上人還越中

禪客無心杖錫還沃洲
深處草堂閑身隨敝屨
經殘雪手紉寒衣入舊山
獨向青溪依樹下空留白日在
人間那堪別後長相憶
雲木蒼蒼但閉關

送耿拾遺歸上都

若為天畔獨歸秦對水看山欲暮春
窮路隔河征戰幾歸人
長安萬里傳雙淚一身想到郵亭愁
駐馬不堪西望見風塵

和樊使君登潤州城樓

山城迢遞敞高樓
露冕吹旄上頭春
草連天隨北望夕陽浮水共東流
江田漠漠全吳地野樹蒼蒼

蔣州王粲尚為南郡客
別來何處更銷憂

餞王相公出牧括州

縉雲詎比長沙遠
出牧猶承明主恩
城對寒山開畫戟
路飛秋葉轉朱轡
江潮淼淼連天望
旌旆悠悠上嶺翻
蕭索庭槐空閉閣
舊人誰到翟公門

題靈祐和尚故居

歎逝翻悲有此身
禪房寂寞見流塵
多一作時行徑空秋草
幾日浮生哭故人
風竹自吟遙入磬
雨花隨淚共沾巾
殘經窓下依然在
憶得山中問許詢

尋龍井楊老

柴門草舍絕風塵空谷耕田學子真泉咽恐勞經隴
底山深不覺有秦人手栽松樹蒼蒼老身卧桃園寂
寂春唯有胡麻當雞黍白雲來往未嫌貧

見故人李均所借古鏡恨其未獲歸府斯人已

亡愴然有作

故人留鏡無歸

一作如何處

今日懷君試暫窺歲久豈堪

塵自入夜長應待月相隨空憐瓊樹曾臨匣猶見菱
花獨映池所恨平生還不早如今始挂隴頭枝

聞虞沔州有替將歸上都登漢東城寄贈

淮南搖落客心悲湏水悠悠怨別離早鴈初辭舊關

塞秋風先入古城池腰章建隼皇恩賜露冕臨人白
髮垂惆悵恨君先我去漢易耆老憶旌麾

唐劉隨州詩集卷第九

隨州刺史劉長卿

獻淮南軍節度李相公

建牙吹角不聞喧三十登壇衆所尊
家散萬金酬士死一作死事身留一劍答君恩
漁陽老將多迴席曾國諸生半在門
白馬翩翩春草細一作陵西去獵平原

觀校獵上淮西相公一無下

龍驤校獵邵陵東野火初燒楚澤空
師事黃公千載一作載後身騎白馬萬人中
笳隨晚吹吟一作曉邊草箭沒寒一作青雲落塞鴻
三十擁旄誰不羨周郎少小



立有一作奇功

送皇甫曾赴上都

東遊久與故人違，西去荒涼舊路微。
秋草不生三徑處，行人獨向五陵歸。
離心日遠如流水，迴首川長共落暉。
楚客豈勞傷此別，滄江欲暮自沾衣。

送李錄事兄歸襄鄧

十年多難與君同，幾處移家逐轉蓬。
白首相逢征戰後，青春已過亂離中。
行人杳杳看西月，歸馬蕭蕭向北風。
漢水楚雲千萬里，天涯此別恨無窮。

漢陽獻李相公

退身高卧楚城幽，獨掩閑門一作雙扉。
漢水頭春草雨中行，徑沒暮山江上捲。
簾愁幾人猶憶一作識，孫弘閣百口里。
一作同乘范蠡舟，早晚却還丞相印。
十年空被白雲留。

長沙過賈誼宅

三年謫宦此棲遲，萬古惟留楚客悲。
秋草獨尋人去後，寒林空見日斜時。
漢文有道恩猶薄，湘水無情吊豈知。
寂寂江山搖落處，憐君何事到天涯。

奉酬辛大夫喜湖南臘月連日降雪見示之作
長沙耆舊拜旌麾，喜見江潭積雪時。
柳絮三冬先北

地梅花一夜遍南枝初開窓閣寒光滿欲掩軍城暮
色遲閭里何人不相慶萬家同唱郢中詞

登餘干古縣城

孤城上與白

一作迢迢楚

雲齊萬古荒涼

一作蕭條

楚水西官

舍已空秋草綠女牆猶在夜烏啼平江渺渺行人度

一作夕

落日亭亭向客低沙鳥不知陵谷變朝來

一作遠

暮去

一作往

代陽溪

將赴嶺外留題蕭寺遠公院

寺即梁朝蕭內史創

竹房遙閉上方幽苔溼蒼蒼訪昔遊內史舊山空日

暮南朝古木向人秋天香月色同僧室月落猿啼傍

客舟此去播遷明主意白雲何事欲相留

初聞貶謫續喜

一本無上六字

量移登干越亭贈鄭校

書

青青草色滿江洲萬里傷心水自流越鳥豈

一作不知

南國

一作南

遠江花獨向北人愁生涯已逐

一作許滄浪

去

一作老

冤氣初逢渙汗收何事還邀遷

一作羈

客醉春

風日夜待歸舟

北歸入至德界偶逢洛陽隣家李光宰

生涯心事已蹉跎舊路依然此重過近北始知黃葉

落向南空見白雲多炎州日日人將老寒渚年年水

自波華髮相逢俱若是故園秋草復如何

自江西歸至舊任官舍贈袁替府

時經劉展平後

却見同官喜復悲此生何幸有歸期空庭客至逢搖
落舊邑人稀經亂離

一作湘路來過迴鴈處江城卧

聽搗衣時南方風土勞君問賈誼長沙豈不知

赴南中題褚少府湖上亭子

種田東郭傍春陂萬事無情把

一作如非

釣絲綠竹放侵

行徑裏

一作斷

青山常對卷簾時紛紛花落門空閉

寂鶯啼日更遲從此列君千萬里白雲流水憶佳

上巳日越中與鮑侍郎泛舟耶溪

蘭橈縵

一作萬

轉傍汀沙應接雲峰到若耶舊浦滿來

移渡口垂楊深處有人家永和春色千年在曲水鄉

心萬里賒君見漁船時借問前洲

一作桃源

幾路入煙花

雙峰下哭故人李宥

憐君孤壠寄雙峰埋骨窮泉復幾重白露空沾九原
草青山獨閉數株松圖書經亂知何在妻子因貧失
所從惆悵東臯却歸去人間無處更相逢

使次安陸寄友人

新年草色遠萋萋久客將歸失路蹊暮雨不知瀆口
處春風共到穆陵西孤城盡日空花落三戶無人自

鳥啼君在江南相憶否門前五柳幾枝低

哭陳欽州

千秋萬古葬平原素業清風及子孫
旅櫬歸程傷道路舉家行哭向田園
空山寂寂開新壠喬木蒼蒼掩舊門
儒行公才竟何在獨憐棠樹一枝存

酬屈突陝

落葉紛紛滿四隣蕭條環堵絕風塵
鄉看秋草歸無路本作歸何處家對寒江病且貧
梨杖懶迎征騎客菊花能醉去官人
憐君計畫誰知者但見蓬蒿空沒身

送惠法師遊天台因懷知大師故居

翠屏瀑水知何在鳥道猿啼過幾重
落日獨搖金策去深山誰向石橋逢
定攀巖下叢生桂欲買雲中若箇峰
憶想東林禪誦處寂寥惟聽舊時鐘

自夏口至鸚鵡洲夕望岳陽寄元中丞

江洲無浪復無煙楚客相思益渺然
漢口夕陽斜渡鳥洞庭秋水遠連天
孤城背嶺寒吹角獨戍臨江夜泊船
賈誼上書憂漢室長沙謫去古今憐

送侯中丞流康州

長江極目帶楓林疋馬孤雲不可尋
遷播共知臣道枉猜讒却爲主恩深
轅門畫角三軍思驛路青山萬

里心北闕九重誰許屈獨看湘水淚沾襟

別一作送嚴士元

春風倚棹闔閭城水國春寒一作殘雲陰復晴細雨濕衣

看不見閑花落地聽無聲日斜江上孤帆影草綠湖

南萬里情東道若逢相識問青袍今日一作已誤儒生

避地江東留別淮南使院諸公

長安路絕鳥飛通萬里孤雲西復東舊業已應成茂

草餘生只是任飄蓬何辭旧物開秦鏡却使他人得

楚弓此去行持一竿竹等閑將狎釣漁翁

罪所上御史惟則

誤因微祿滯南昌幽繫圓扉晝夜長黃鶴翅垂同鷺

雀青松心在任風霜斗間誰與看冤氣盆下無由見

太陽賢達不能同感激更於一作令何處問蒼蒼

送台州李使君燕竒題國清寺

露冕新承明主恩山城別是武陵源花間五馬時行

縣山外千峰常在門晴江洲渚帶春草古寺杉松深

暮猿知到應真飛錫處因君一想已忘言

獄中聞收東京有赦

傳聞闕下降絲綸為報關東滅虜塵壯志已憐成白

首餘生猶待發青春風霜何事偏傷物天地無情亦

愛人持法不須張密網恩波自解惜枯鱗

溫湯客舍

冬狩溫泉歲欲闌宮城佳氣晚宜看湯熏仗裏千旗
暖雪照山邊萬井寒君門獻賦誰相達客舍無錢輒
自安且喜禮闈秦鏡在還將妍醜付春官

送孫逸歸廬山

得帆字

鑪峰絕頂楚雲街楚客東歸棲此巖一作巖彭蠡湖邊
香橘柚潯陽郭外暗楓杉青山不斷三湘道飛鳥空
隨萬里帆常愛此中多勝事新詩他日佇開緘

送馬秀才落第歸江南

南客懷歸鄉夢頻東門悵別柳條新慙慙斗酒城陰
暮蕩漾孤舟楚水春湘竹舊斑思帝子江籬初綠怨
騷人憐君此去未得意陌上愁看淚滿巾

送常十九歸嵩少故林

迢迢此恨杳無涯楚澤高丘千里賒岐路別時驚一
葉雲林歸處憶三花秋天蒼翠寒飛鴈古堞蕭條晚
噪鷓他日山中逢勝事桃源洞裏幾人家

送宇文遷明府赴洪州張觀察追攝豐城令

時長

卿亦在此州

送君不復遠為心余亦扁舟湘水陰路逐山光何處

盡春隨草色向南深陳蕃待客應懸榻宓賤之官獨
抱琴儻見主人論謫宦爾來空有白頭吟

送李將軍

征西諸將一如君報德誰能不顧勳身逐寒鴻來萬
里手披荒草看孤墳擒生絕漠經胡雪懷舊長沙哭
楚雲歸去蕭條灞陵上幾人看葬李將軍

西陵寄一上人

東山詩道開成士南渡隨陽作本師了義惠心能善
誘吳風越俗罷淫祠室中時見天人命物外長懸海
嶽期多謝清言異玄度懸河高論有誰持

賦得

鶯啼燕語報新年馬邑龍沙路幾千家住層城臨漢
苑心隨明月到胡天機中錦字論長恨樓上花枝笑
獨眠爲問元戎寶車騎何時返旆勒燕然

三月李明府後庭泛舟

江南風景復如何聞道新庭更欲過處處紉蘭春浦
涿萋萋籍草遠山多壺觴湏就陶彭澤時俗猶傳晉
永和更待持梳徐轉去微風落日水增波

喜朱拾遺承恩拜命赴任上都

詔書徵拜脫荷裳身去東山閉草堂閭闔九天通楚

籍華亭一鶴在朝行滄洲離別風煙遠青瑣幽深漏
刺長今日却迴垂釣處海鷗相見已高翔

鄭上送常司士歸上都舊業

司士即鄭公之
孫頃客於鄭上

前朝舊業想遺塵今日他鄉獨爾身
鄭地國除爲過客杜陵家在有何人
蒼苔白露生三徑古木寒蟬滿四隣
西去茫茫問歸路關河漸近淚盈巾

一本自古
木寒蟬滿

四隣下此去茫茫盡秋
草離心萬里逐征輪

感懷

秋風落葉正堪悲黃菊殘花欲待誰
水近偏逢寒氣早山深常見日光遲
愁中卜命看周易夢裏招魂讀

楚詞自笑不如湘浦鴈飛來即是北歸時

送楊於陵歸宋汴州別業

斗山溪雨帶斜暉向水殘花汙客衣
旅食嗟余當歲晚能文似汝少年稀
新河柳色千株暗故國雲帆萬里歸
離亂要知君到處寄書須及鴈南飛

哭陳使君

千秋萬古共平原唯有清風及子孫
旅櫬歸程傷道路舉家行哭向田園
寒山搖落空殘壠故里踈蕪獨掩門
儒行公才更何用欲將脩短問乾坤

送崔使君赴壽州

列郡專城分國憂形幘皂蓋古諸侯仲華遇主年猶
少公瑾論功位已酬草色青青迎建隼蟬聲處處雜
鳴騶千里相思如可見淮南木葉正驚秋

上陽宮望幸

玉輦西巡久未還春光猶入上陽間萬木長承新雨
露千門空對舊河山深花寂寂宮城閉細草青青御
路閑獨見彩雲飛不盡只應來去候龍顏

過裴舍人故居

惻惻天寒獨掩扃紛紛黃葉滿空庭孤墳何處依山
木百口無家學水萍籬花猶及重陽發鄰笛那堪落

日聽書幌無人長不捲秋來芳草自爲螢

登松江驛樓北望故園

淚盡江樓北望歸田園已陷百重圍平蕪萬里無人
去落日千山空鳥飛孤舟漾漾寒潮小極浦蒼蒼遠
樹微白鷗漁父徒相待未掃攬搶懶息機

秋夜有懷高三十五適兼呈空上人

晚節逢君道趣深結茆栽樹近東林吾師幾度曾摩
頂高士何年遂發心北渚三更聞過鴈西城萬里動
寒砧不見支公與玄度相思擁膝坐長吟

送孔巢父赴河南軍

按此詩皇甫舟所作

江南相送隔煙波，况復新秋一鴈過。
聞道全軍征北虜，又言諸將會南河。
邊心冉冉鄉人絕，寒色青青戰馬多。
共許陳琳工奏記，知君名行未蹉跎。

登潤州萬歲樓

按此詩皇甫舟所作

高樓獨上思依依，極浦遙山合翠微。
江客不堪頻北望，塞鴻何事又南飛。
丹陽古渡寒煙積，瓜步空洲遠樹稀。
聞道王師猶轉戰，誰能談笑解重圍。

江樓送太康郭主簿赴嶺南

對酒憐君安，可論富貴愛。士如平原料，錢用盡却爲。
謗，食客空多誰報恩。萬里孤舟向南越，蒼梧雲中暮

沈滅樹色應無江北秋，天涯尚見淮陽月。
驛路南隨桂水流，猿聲不絕到蠻州。
青山落日那堪望，誰見思君江上樓。

客舍喜鄭三見寄

客舍逢君未換衣，閉門愁見桃花飛。
遙想故園今已爾，家人應念行人歸。
寂寞垂楊映深曲，長安日暮靈臺宿。
窮巷無人鳥雀閑，空庭新雨莓苔綠。
此中分與故交疎，何幸仍廻長者車。
十年未稱平生意，好得辛勤謾讀書。

送賈三北遊

賈生未達猶窘迫身馳足馬邯鄲陌片雲郊外遙送
人斗酒城邊暮留客顧予他日仰時髦不堪此別相
思勞雨色新添漳水綠夕陽遠照蘇門高把袂相看
衣共緇窮愁只是惜良時亦知到處逢榻下莫滯秋
風西上期

齊一和尚影堂

一公住世忘世紛暫來復去誰能分身寄虛空如遇
客心將生滅是浮雲蕭散浮雲往不還淒涼遺教歿
仍傳舊地愁看雙樹在空堂只是一燈懸一燈長照
恒河沙雙樹猶落諸天花天花寂寂香深殿苔蘚蒼
蒼闕虛院昔余精念訪禪扉常接微言清道機今來
寂寞無所得唯共門人淚滿衣

唐劉隨州詩集卷第九

唐劉隨州詩集卷第十

隨州刺史劉長卿

潁川留別司倉李萬

故人早負于將器誰言未展平生意想君疇昔高步
時肯料如今折腰事且知投刃皆若虛日揮案牘常
有餘槐暗公門趨小吏荷香陂水膾鱸魚客裏相逢
款話深如何岐路刺霑襟白雲西上催歸念潁水東
流是別心落日征驂隨去塵含情揮手背城闈已恨
良時空此別不堪秋草更愁人

聽笛歌

留別鄭協律

舊遊憐我長沙謫載酒沙頭送遷客天涯望月自沾
衣江上何人復吹笛橫笛能令孤客愁淥波淡淡如
不流商聲嘹亮羽聲苦江天寂歷江楓秋靜聽關山
聞一叫三湘月色悲猿嘯又吹楊柳激繁音千里春
色傷人心隨風飄向何處落唯見曲盡平湖深明發
與君離別後馬上一聲堪白首

時平後送范倫歸安州

昨聞戰罷圖麟閣破虜收兵卷戎幕滄海初看漢月
明紫微已見胡星落憶昔扁舟此南渡荆棘煙塵滿
歸路與君携手姑蘇臺望鄉一日登幾迴白雲飛鳥

去寂寞吳山楚岫空崔嵬

一作望崔嵬

事往時平還舊丘

青青春草近家愁洛陽舉目今誰在潁水無情應自
流吳苑西人去欲稀留連一日空知非江潭歲盡愁
不盡鴻鴈春歸身未歸萬里遙懸帝鄉憶五年空帶
風塵色却到長安逢故人不道姓名應不識

小鳥篇上裴尹

藩籬小鳥何甚微翩翩日夕空此飛只緣六翮不自
致長似孤雲無所依西城黯黯斜暉落衆鳥紛紛皆
有託獨立雖輕鷺雀群孤飛還懼鷹鷂搏自憐天上
青雲路吊影徘徊獨愁暮銜花縱有報恩時擇木誰

容托身處歲月蹉跎飛不進羽毛顛顛何人問遠樹
空隨烏鵲驚巢林只有鷓鴣分主人庭中陰喬木愛
此清陰欲棲宿少年挾彈遙相猜遂使驚飛往復迴
不辭奮翼向君去唯怕金丸隨後來

登吳古城歌

登古城兮思古人感賢達兮同埃塵望平原兮寄遠
目歎姑蘇兮聚麋鹿黃池高會事未終滄海橫流人
蕩覆伍員殺身誰不冤竟看墓樹如所言越王嘗膽
安可敵遠取石田何所益一朝空謝會稽人萬古猶
傷甬東客黍離離兮城坡地牛羊踐兮牧豎歌野無

人兮秋草綠園為墟兮古木多白楊蕭蕭悲故柯黃
雀悲兮晚禾荒阡斷兮誰重過孤舟逆兮愁若何
天寒江楓落葉去辭風水自波

疲兵篇

驕虜乘秋下薊門陰山日夕煙塵昏三軍疲馬力已
盡百戰殘兵功未論陣雲決滸屯塞北羽書紛紛來
不息孤城望處增斷腸折劍看時可需臆元戎日夕
且歌舞不念關山久辛苦自矜倚劍氣凌雲却笑聞
笳淚如雨萬里飄飄空此身十年征戰老胡塵赤心
報國無片賞白首還家有幾人朔風蕭蕭動枯草旌

旗獵獵榆關道漢月何曾照客心胡笳只解催人老
軍前仍欲破重圍閨裏猶應愁未歸小婦十年啼夜
織行人九月憶寒衣飲馬滹河晚更清行吹羌笛遠
歸營只恨漢家多苦戰徒遺金鏃滿長城

新安送陸澧歸江陰

新安路人來去早潮復晚潮明日知何處潮水無情
亦解歸自憐長在新安住

弄白鷗歌

泛泛江上鷗毛衣皓如雪朝飛瀟湘水夜宿洞庭月
歸客正夷猶愛此滄江開白鷗

長沙贈衡岳祝融峰般若禪師

般若公般若公負鉢何時下祝融歸路却看飛鳥外
禪房空掩白雲中桂花寂寂閑自落流水無心西復
東

贈湘南漁父

問君何所適暮暮逢煙水獨與不繫舟往來楚雲裏
釣魚非一歲終日只如此日落江清桂檝遲纖鱗百
尺深可窺沉鈎垂餌不在得白首滄浪空自知

明月灣尋賀九不遇

二首

楚水日夜綠傍江春草滋青青遙滿目萬里傷心歸

春草滋一云春色深
傷心歸一云傷歸心

故人川上復何之
明月灣南空所思
故人不在明月在
誰見孤舟來去時

題曲阿三昧王佛殿前孤石

孤石自何處對之疑舊遊
氛氳峴首夕蒼翠刻中秋
迥出群峰當殿前
雪山靈鷲慙貞堅
一片孤雲長不去
莽苔古色空蒼然

送友人東歸二首

對酒灞亭暮相看
愁自深河邊草已綠
此別難爲心其二

關路迢迢足馬歸
垂楊寂寂數鶯飛
憐君獻策十餘載
今去猶爲一布衣

入桂渚次砂牛石穴

扁舟傍歸路日暮瀟湘深
湘水清見底楚雲澹無心
片帆落桂渚獨夜依楓林
楓林月出猿聲苦桂渚天
寒桂花吐此中無處不堪愁
江客相看淚如雨

嚴陵釣臺送李康成赴江東使

潺湲子陵瀨髮髯如在目
七里人已非千年水空綠
新安江上孤帆遠應逐
楓林萬餘轉古臺落日共蕭
條寒水無波更清淺
臺上漁竿不獲持却令猿鳥向

人悲灘聲山翠至今在遲爾行舟晚泊時

送姨子弟住南郊

一展慰久澗寸心仍未伸別時兩童稚及此俱成人
那堪適會面遽已悲分首客路向楚雲河橋對衰柳
送君疋馬別河橋汝南山郭寒蕭條今我單車復西
上遙望灞陵轉惆悵何處共傷離別心明月亭亭兩
鄉望

銅雀臺

嬌愛更何日高臺空數層含啼映雙岫不忍看西陵
漳河東流無復來百花輦路爲蒼苔清樓月夜長寂
寞碧雲日暮空徘徊君不見鄴中萬事非昔時古人
不在今人悲春風不逐君王去草色年年舊宮路宮
中歌舞已浮雲空指行人往來處

王昭君歌

自矜嬌艷色不顧丹青人那知粉繪能相負却使容
華翻誤身上馬辭君嫁驕虜王顏對人啼不語北風
颺急浮雲秋萬里獨見黃河流纖腰不復漢宮寵雙
蛾長向胡天愁琵琶絃中苦調多蕭蕭羌笛聲相和
誰憐一曲傳樂府能使千秋傷綺羅

送杜越江佐覲省往新安江

去帆楚天外望遠愁復積想見新安江扁舟一行客
清流數千丈底下看白石色混元氣深波連洞庭碧
鳴榔去未已前路行可覲猿鳥悲啾啾杉松雨聲夕
送君東赴歸寧期新安江水遠相隨見說江中孤嶼
在此行應賦謝公詩

湘中憶歸

終日空理棹經年猶別家頃來行已遠彌覺天無涯
白雲意自深滄海夢難隔迢遞萬里帆飄颻一行客
獨憐西江外遠寄風波裏平湖流楚天孤鴈渡湘水
湘流澹澹空愁予猿啼啾啾滿南楚扁舟泊處聞此
聲江客相看淚如雨

送郭六侍從之武陵郡

常愛武陵郡美君將遠尋空憐世界迫孤負桃源心
洛陽遙想桃源隔野水閑流春自碧花下常迷楚客
船洞中時見秦人宅落日相看斗酒前送君南望但
依然河梁馬首隨春草江路猿聲愁暮天丈人別乘
佐分憂才子趨庭兼勝遊澧浦荆門行可見知君詩
興滿滄洲

山鷓鴣歌

山鷓鴣長在此山吟古木啾嘶相呼響空谷哀鳴萬

變如成曲江南逐臣悲放逐倚樹聽之心斷續巴人
峽裏自聞猿燕客水頭空擊筑山鷓鴣一生不及雙
黃鵠朝去秋田啄殘粟暮入寒林嘯群族鳴相逐啄
殘粟食不足青雲杳杳無力飛白露蒼蒼抱枝宿不
知何事守空山萬壑千峰自愁獨

望龍山懷道士許法稜

心惆悵望龍山雲之際鳥獨還懸崖絕壁幾千丈綠
蘿嫋嫋不可攀龍山高誰能踐靈原中蒼翠晚嵐煙
瀑布如向人終日迢迢空在眼中有一人披霓裳誦
經山頂殮瓊漿空林閑坐獨焚香真官列侍儼成行
朝入青霄禮玉堂夜掃白雲眠石床桃花洞裏居人
滿桂樹山中住日長龍山高高遙相望

戲贈于越尼子歌

鄱陽女子年十五家本秦人今在楚狀向春江空澆
沙龍宮落髮披袈裟五年持戒長一食至今猶自顏
如花亭亭獨立青蓮下忍草禪枝繞精舍自用黃金
買地居能嫌碧玉隨人嫁北客相逢疑姓秦鈿花拋
却仍青春一花一竹如有意不語不笑能留人黃鸝
欲棲白日暮天香未散經行處却對香爐閑誦經春
泉漱玉寒泠泠雲房寂寂夜鍾後吳音清切令人聽

人聽吳音歌一曲杳然如在諸天宿誰堪世事更相
牽惆悵迴船江水綠

唐劉隨州詩集卷第十

唐劉隨州詩集卷第十一

隨州刺史劉長卿

冰賦

水無心而清。冰虛已而明。始則同體。終然異名。水之動。我變而靜。水之柔。我變以貞。任方圓而能處其順。雖高下而不失其平。北陸初凝。結而為冰。東風始起。融而為水。與時合散。隨物行止。水也。莫知其所然。冰也。莫知其所以何。推運而有恒。乃忘情而合理。觀其外。示貞堅。內含虛澈。無受染能保其素。不納汙能全其潔。比玉而白。不為蠅點。比月而明。不為蟾闕。瓊樹

色奪。瑤池光發。寒日爲之青熒。陰天爲之蕭殺。奚自
止水。遍于大川。萬穴俱閉。長波寂然。皎皎彌淨。峨峨
遠連。如雪覆地。如雲披天。雲之凝兮。佇長風而可掃。
雪之積兮。向太陽而莫全。豈同夫氣之所感。物莫能
遷。勁飈夕寒。我力增壯。愛景朝暖。我心猶堅。其堅伊
何。履霜斯至。其薄伊何。臨泉是畏。君子用之。以馴致
其道。睹之而不驕於貴者也。二之日始鑿命虞官。三
之日始納享司寒。四之日天子陳禮。容賦函風。大啓
冰室。獻于王宮。氣肅雲陞。寒生袞龍。闢九門於月下。
列千官於鏡中。頒衆位。取飲以受命。御至尊。得象其

朝宗。若君莫之求。臣莫之見。則深山窮谷。詎可得而
嘉薦。苟藏不以周。用不以徧。則災霜害電。如有待而
爲變。人或好清。人或好淨。旣潔其跡。亦虛其性。水之
冰。生於寒。人之冰。出於正。不棄其道。吾將何病。

首夏于越亭奉餞常卿使君赴婺州序

今年春王正月。皇帝居紫宸正殿。擇東南諸侯。以我
公爲少光祿。目姑蘇。行春於東陽。愛人也。頃公之在
吳。值攬滄構。戾南犯牛斗。波動滄海。塵飛金陵。公夷
險。一心忠勇。增氣四面。皆敵。姑蘇獨守。卧甲霜天。洗
兵寒水。竟使浙南。士庶不見煙塵。公之力也。朝廷聞

而多之以爲姑蘇之人已理東陽之俗未化是拜也
宜哉卿月旣明仁風載清出入數藩從容九棘在虞
秦而皆智豈滕薛而異名頌聲洋洋實此行矣千越
便道金華前山梅花過時槐色猶在白雲芳草盡入
詩興公實秉文律特爲詞雄逶迤退公知八詠之有
繼作矣

仲秋奉餞蕭郎中使君赴潤州序

皇帝臨軒旰食憂濟在人擇良二千石與之共理民
有疾苦得以安之吏有侵漁得以去之爲風化之本
繫黎元之命不其難哉故內外缺官自卿大夫以下

多責成元輔惟剖竹分寄決在禁中又以政責有成
化難數易至於理行超異公論當徵但增秩賜金或
移典大郡而已由是蕭公建隼茲地化行五年漢庭
群公方侍以右職而競有南徐之命蓋天子憂遠人
而緩徵拜也公才可以濟物德可以化人五行之用
備四時之氣足不立法而去弊不示禁而止姦寒者
有衣飢者有食百城萬井若衆草之得陽春亦不知
其所以然也詔書旣至公乃向闕北拜腰章遂行南
徐之人望公如歸此邦之人去公如失千騎照路出
於東郊男女滿野壺漿輻湊泣涕以送邀遮以留或

攀我車或維我舟臨風鳴笳慷慨高秋君子是謂有古人之遺愛矣凡工文者得無詩乎

張僧繇畫僧記

天竺僧畫像者梁直閣將軍張僧繇之真跡也張公繪事之始厥有二僧後屬侯景師至金陵江南喪亂此畫流離散落多歷年所遂遭刺割分而為二其一在唐故常侍陸堅處即此僧也陸公嘗嬰篤疾殆將屬繯忽於夢寐覩此胡僧謂公曰我有同侶一人自從離析已百餘載今在洛陽故城東李君家深所寶玩舉世莫知若能為我求之再得會合當以法力拯

助令爾

一作令

無憂陸公既寤爰以求訪果如夢中之

旨獲見斯人而僧亦具在乃以俸錢十萬購而合焉即日陸公疾瘳勿藥有喜信哉造思之妙通於神祇識者以為干將鑌錐散而復合亦其類也嗟乎陸公已沒子孫不守有故姬鬻之於市為校書郎宋儋所得儋服藥過度因而喪明其李氏之僧復失所在唯入夢者巋然獨存儋卒傳故人劉傑傑隱居少室不求聞達天寶末遭祿山之難避地淮陰與道士魏審交深相結納無何傑以老卒傳於審交審交傳楚州刺史李湯湯傳睦州司馬劉長卿今為劉氏之寶藏

矣一作

祭蕭相公文華

維某年月日殿中侍御史劉長卿謹以清酌庶羞之奠敬祭于故江州刺史相國蕭公之靈天降全德俾居元輔獨立堂堂高視前古和氣同積英姿外舉草木陽春山川時雨累葉當國同心事主業繼帝平世生申甫龍潛少海公佐儲闈朝有奸臣動履危機十年調護不處嫌疑非以智免則將禍隨國移大盜公陷虜園忍受拘逼誓酬恩私苟無所成雖死何爲果翻賊黨來赴王師懿夫川實朝宗雲亦從龍天地再

開君臣相逢獨持一心翊戴兩宮明略戡難丹誠徇

公輔國佞幸敢亂朝經潛申讜言請奪禁兵謀泄隙

一作謀泄隙開反爲所傾倉卒之際播遷無名東出招丘

南浮洞庭寄身滄江泛若流萍水國生疾炎洲促齡

瓊樹先落金丹未成長卿自奉周旋于今五年才微

顧重跡近位懸卽之溫如望之儼然獎飭何厚招尋

亦備春山採擷秋水涸涸候月舒嘯臨風扣舷懷舊

如昨承歡眼前素業遂空清風獨遠哀哀孝子行哭

而反託體山阿古來誰免湘流垂釣楚挽空吟明主

恩絕蒼生愛深江南春草自古傷心想像平生猶聞

德音嗚呼哀哉去旌搖搖送馬蕭蕭長江遠山暮暮
朝朝山有歸雲江有回潮公之逝矣一言寂寂挂劍
於此魂兮可招尚饗

祭崔相公文

維年月日某乙謹以清酌之奠敬祭于故道州刺史
相國崔公之靈唯岳降靈惟公佐時大國梁棟中朝
羽儀清迥玉立峨峨冰姿秋水見底寒松無枝天步
艱難海內崩離六合恟然一言安之帝憂南方公實
載馳江漢之人惟公是依持衡署吏按節臨師三軍
感恩多士如歸何名高而難恃翻寄重而先疑旋剖

竹於滄海罷調梅於赤墀公頃歸朝時逢出震體道
而處忘機於進澹然一心獨立千仞望重元老恩深
顧問言必至公行惟周慎守孤直以見疾觸姦邪而
結譽公之爲善匪近於名公之在貴匪貪其榮人皆
畏黜公猶不驚飛鳥無跡白雲何情拜手魏闕退身
楚城北渚在途南風掩扇顧婆娑之樹老歌滄浪之
水清雖優閑而適性終卑濕而傷生嗟乎若以神之
輔德將未喪其正直若以天之愛人當復佐於陶鈞
棄蒼生而不起留清風以益振長卿昔忝初秩公之
一顧謬廁當時之選敢忘國士之遇旅櫬還鄉危旌

啓路吊湘水而自波望長沙而空暮嗚呼萬古兮歸
舟千里兮東流過洞庭而搖落出夏口而夷猶月蒼
蒼兮江淼淼人不見兮猿獨愁徒髣髴兮如在竟寂
寥而若休尚饗

祭閻使君文

維年月日某乙謹以清酌之奠祭于故睦州刺史閻
公之靈猗歟我公誕靈中和盛德茂才如山如河玉
立清迥冰姿峨峨獨鶴不群孤松無柯班氏九流孔
門四科總而懷之巨海長波遭時艱難避地江沲浙
水之源剖竹來過百城風偃萬室星羅感恩具存賞

罰無頗帷褰訟止一負肩摩俗謠蔽芾庭顧婆娑沈
侯高詠謝客疲痾人之云亡天意若何故鄉道阻旅
殞山阿哀哀孝子霑露滋多常懼流年丘壠陂陀乃
告元龜是宅其他嗚呼我公所悲則那今去也哭昔
來也歌引發東郊攀恩幡幡銘旌夕沒漭滄寒菼緬
懷生平持奉仁和感恩臨奠悲如之何尚饗

又

維某年月日某乙謹以清酌之奠祭于故睦州刺史
閻公之靈天縱厚德曜于當代天與盛才俾夫濟世
經綸萬類磅磚六藝禮樂詩書自中形外玉山迥出

瓊樹無對秦鏡洞開吳鉤新淬青春立節白首彌勵
五府交爭辟書相繼九州分按無遠不屆所居則理
其去懷惠焦心苦形興利除害運屬橫流道猶未濟
一麾出守萬里長逝故林之下永閉龍泉埋沒于此
經今幾年藹藹豐里油油原田田則有稼公之闢焉
里則有桑公之植焉我衣我食公實賜焉人亡物在
事往名傳滄海則變清風不愆長卿昔慰長洲公爲
半刺一命之末三年伏事愛我以文獎我以吏禮變
常儀恩生非次懷舊如在感今斯異身辱良知情依
令嗣中原多梗旅櫬猶寄挂劔傷心有碑墜淚東風

映律草綠川媚陽和發生物性咸遂冥冥逝者獨翳
茲地空對一枝音容步髯尚饗

祭董兵馬使文

維年月日某乙謹以清酌之奠祭于故鎮守兵馬使
董公之靈温温董公純厚謙恭忠孝因心禮樂在躬
薄伐襄漢言從征東遠將偏師獨當群兇朱旗薄霄
白羽生風彼衆我寡兵盡矢窮手張空拳力殫氣雄
孟明失律李廣無功有志不遂飲恨而終落梅笛怨
細柳營空猶嘶戰馬永挂良弓銘旌悠悠此去何從
寶劔埋沒黃泉幾重尚饗

祭故吏行官文

維年月日某乙以清酌之奠致祭于故吏行官某乙之靈生也有涯天之常理悲夫逝者不得其死瞻彼行潦兮一勺之水嗟爾浮生兮千齡已矣憶昨金陵喪亂宣城危逼王師有征將破殘賊我事戎旃爾為羽翼實執鞭弭豈辭筋力能罷失利豺狼反顧衣冠四散余之南渡白刃向人黃塵欲暮平生門闌皆已行路唯爾臨危秉心益固一身相依千里徒步嗚呼故鄉何在旅櫬何歸聖哲春綠孤魂夜飛心存簪履淚滿裳衣空餘片酒以慰泉菲

唐睦州司倉參軍盧公夫人鄭氏墓誌銘

有唐大曆十三年九月二十一日睦州司倉參軍陽盧公夫人鄭氏終於所寓之官舍享年四十八以其月二十九日盧公受命於元龜權厝於建德縣佩犢鄉之東原禮也夫人榮陽人也曾王父松皇朝魏州莘縣令王父行恩晉州臨汾縣令父叔衛州新鄉縣丞鄭氏之先家諱詳矣元魏以衣冠人物首出諸族之右者五姓我居其一世濟厥美史不絕書夫人即新鄉府君第五女天姿淑德早有令聞中外推之難於擇對年十九以束帛墨車之禮遂歸于公在榮

陽家號女師入涿縣人稱婦道恭儉以事上柔順以
建下服澣濯躬勤勞山東士風於是乎在嗚呼伯老
斯闕從秩猶卑不及中年梧桐半死安仁悼亡之歎
人皆代而痛之一子一孫誣于彼蒼泣血而已銘曰
新鄉積善遂生淑媛詞邁克脩乃光好仇母儀婦德
萬古千秋新安江水已矣東流

唐劉隨州詩集卷第十一

唐劉隨州外集

隨州刺史劉長卿

重送

猿啼客散暮江頭，人自傷心水自流。
同作逐臣君更遠，青山萬里一孤舟。

恩勅重推使牒，追赴蘇州次前溪館作

漸入雲峰裏，愁看驛路閑。
亂鷗投落日，疲馬向空山。
且喜憐非罪，何心戀未班。
天南一萬里，誰料得生還。

劉展平後

却見同官喜復悲，此生何幸有歸期。
空庭客至逢搖

落舊邑人踈經亂離湘路未過回鴈處江城卧聽搗衣時南方風土勞君問賈誼長沙豈不知

送裴二十七端公使嶺南

蒼梧萬里路空見白雲來遠國知何在憐君去未回桂林無落葉梅嶺自花開陸賈千年後誰看潮漢臺

雙峰下故人李宥

憐君孤壠寄雙峰埋骨窮泉復幾重白露空沾九原草青山獨閉數株松圖書經亂知何在妻子移家失所從惆悵東臯却歸去人間無處更相逢

雲秋嶺

鳳駕瞻西幸龍樓議北征自將行破竹誰學去吹笙白日重輪慶玄穹再造榮鬼神潛蓄憤夷狄遠輸誠海內戎衣卷關中賊壘平山川隨戰轉草木助橫行區宇神功立謳歌帝業成天回萬象變龍見五雲迎小苑春猶在長安自更明星辰歸正位雷雨發殘生文物登前古簫韶下太清未央新柳色長樂舊鍾聲八使推邦彥中司按國程蒼生屬伊呂明望伏韓彭兇醜將除蔓奸豪已負荆世危看柱石時難識忠貞薄伐貞貔武長驅擁旌旌吳山依重鎮江月帶行營金石懸詞律煙雲動筆精運籌初減竈調鼎未和羹

北虜傳初解東人望已傾池塘催謝客花木待春卿
昔忝登龍首能傷困驥鳴艱難悲伏劔提握喜懸衡
巴曲誰堪聽秦臺自有情遂令辭短褐仍欲請長纓
久客田園廢初官印綬輕榛蕪上國路苔蘚北山楹
懶慢羞趨府驅馳憶退耕榴花無暇醉蓬髮帶愁縈
地僻方言異身微俗慮平家憐雙鯉斷才愧小鮮烹
滄海今猶值青陽歲又更洲香生杜若谿暖戲鴉鵲
煙雪宜春候寒開值晚晴漸潮來萬井山色映孤城
旅夢親喬木歸心亂早鶯儻無知已在今已訪蓬瀛

唐劉隨州外集

